


舊五代史

卷三十一
之三十一


涵芬樓
影印



Blue Cyan Green Yellow Red Magenta White 3/Color Black

TIFFEN Color Control Patches



© The Tiffen Company, 2007




舊五代史卷三十一

宋門下侍郎參知政事監修國史蔣中正等撰

唐書第七



同光二年春正月庚申朔... 式王賓... 舞名盛祖室曰... 曰應天之舞昭... 大冠至元橋... 節度使李嗣源為北面行營都統討使政州留後羅彥



舊五代史卷三十一

宋門下侍郎參知政事監修國史薛居正等撰

唐書第七

莊宗紀五

同光二年春正月庚子朔帝御明堂殿受朝賀仗衛如
式壬寅南郊禮儀使太常卿李燕進太廟登歌酌獻樂
舞名懿祖室曰昭德之舞獻祖室曰文明之舞太祖室
曰應天之舞昭宗室曰永平之舞甲辰幽州上言契丹
入寇至瓦橋契丹國志時契丹日益強盛遣使就唐求幽州以處盧文進以天平軍
節度使李嗣源爲北面行營都招討使陝州留後霍彥

威爲副率軍援幽州已故宣武軍節度副使權知軍州事檢校太傅王瓚贈太子太師丁未詔改朝元殿復爲明堂殿又改崇勳殿爲中興殿戊申以振武軍節度使檢校太傅同平章事李存霸權知潞州留後以知保大軍軍州事高允韜爲檢校太保庚戌以涇原節度使充秦王府諸道行軍司馬開府儀同三司檢校太尉兼侍中李暉爲檢校太尉兼中書令依前涇原軍節度使充秦王府諸道行軍司馬詔改應順門爲永曜門太平門爲萬春門通政門爲廣政門鳳明門爲韶和門萬春門爲中興門解卸殿爲端明殿是日詔曰皇綱已正紫

禁方嚴凡事內官不合更居外地詔諸道應有內官不計高低並仰逐處并家口發遣赴闕不得輒有停滯帝龍潛時寺人數已及五百至是合諸道赴闕者約千餘人皆給賜優贍服玩華侈委之事務付以腹心唐時宦官爲內諸司使務諸鎮監軍出納王命造作威福昭宗以此亡國及帝奄有天下當知戒彼前車以爲殷鑒一朝復興茲弊議者惜之新羅王金村英遣使朝貢辛亥中書門下奏準本朝故事諸王內命婦宰臣學士中書舍人諸道節度防禦團練使留後官告卽中書帖官告院索綾紙標軸下所司書寫印署畢進入宣賜其文武

兩班及諸道官員並奏薦將校並合于所司送納朱膠
綾紙價錢伏自偽梁不分輕重並從官給今後如非前
件事例請官中不給告勅其內司大官侍衛將校轉官
卽不在此限從之壬子蜀主王衍致書于帝稱有詐爲
天使馳報收復汴州者詔捕之不獲癸丑有司奏郊祀
前二日迎祔高祖太宗懿祖獻祖太祖神主于太廟議
者以中興唐祚不宜以追封之祖雜有國之君以爲昭
穆自懿祖已下宜別立廟于代州如後漢南陽故事可
也幽州北面軍前奏契丹還塞詔李嗣源班師鳳翔節
度使秦王李茂貞上表請行藩臣之禮帝優報之甲寅

帝于中興殿面賜郭崇韜鐵券有司上言皇太后到闕
皇帝合于銀臺門內奉迎詔親至懷州奉迎中書奏自
二十三日後散齋內車駕不合遠出詔改至河陽奉迎
以禮部尚書興唐尹王正言依前禮部尚書充租庸使
乙卯渤海國遣使貢方物幽州奏媯州山後十三寨百
姓却復新州戊午以前太子少師薛廷珪爲檢校戶部
尚書太子少師致仕以前太子賓客封舜卿爲太子少
保致仕以前太子賓客李文規爲戶部侍郎致仕詔鹽
鐵度支戶部並委租庸使管轄庚申四方館上言請今
後除隨駕將校及外方進奉專使文武班三品已上官

可以內殿對見其餘並詣正衙以申常禮從之車駕幸河陽奉迎皇太后辛酉帝侍皇太后至文武百寮迎于上東門是日河中府上言稷山縣割隸絳州以太僕卿李紆爲宗正卿以衛尉卿楊邁爲太僕卿西京昭應縣華清宮道士張冲虛上言天尊院枯檜重生枝葉乙丑有司上言南郊朝享太廟舊例親王充亞獻終獻行事乃以皇子繼岌爲亞獻皇弟存紀爲終獻丙寅帝赴明堂殿致齋丁卯朝饗于太微宮戊辰饗太廟是日赴南郊二月己巳朔親祀昊天上帝于圜丘禮畢宰臣率百官就次稱賀還御五鳳樓宣制大赦天下應同光二年

二月一日昧爽已前所犯罪無輕重常赦所不原者咸赦除之十惡五逆屠牛鑄錢故殺人合造毒藥持杖行劫官典犯贓不在此限應自來立功將校各與轉官仍加賞給文武常參官節度觀察防禦刺史軍主都虞候指揮使父母亡歿者並與追贈在者各與加爵增封諸藩鎮各賜一子出身仍封功臣名號畱後刺史官高者加階爵一級官卑者加官一資應本朝內外臣寮被朱氏殺害者特與追贈應諸州府不得令富室分外收貯見錢禁工人鎔錢爲銅器勿令商人載錢出境近年已來婦女服飾異常寬博倍費縑綾有力之家不計卑賤

悉衣錦繡宜令所在糾察應有百姓婦女曾經俘擄他處爲婢妾者一任骨肉認識男子曾被刺面者給與憑據放逐營生召天下有能以書籍進納者各等第酬獎仰有司速檢勘天下戶口正額墾田實數待憑條理以息煩苛是日風景和暢人胥悅服議者云五十年來無此盛禮然自此權臣愎戾伶官用事吏人孔謙酷加賦斂赦文之所原放謙復刻剝不行大失人心始于此矣庚午租庸使孔謙奏諸道綱運客旅多于私路苟免商稅請令所在關防嚴加捉撈從之癸酉宰臣豆盧革率百官上尊號曰昭文睿武至德光孝皇帝凡三上表從

之甲戌詔曰汴州元管開封浚儀封邱雍邱尉氏陳留六縣僞庭割許州鄆陵扶溝陳州太康鄭州陽武中牟曹州考城等縣屬焉其陽武匡城扶溝考城四縣宜令且隸汴州餘還本部丙子以隨駕參謀耿瑋爲司天監丁丑以光祿大夫檢校司徒李筠爲右騎衛上將軍戊寅幸李嗣源第作樂盡歡而罷己卯以河中節度使冀王李繼麟兼安邑解縣兩池權鹽使辛巳以檢校太師守尚書令河南尹判六軍諸衛事魏王張全義爲守太尉兼中書令河陽節度使河南尹改封齊王以開府儀同三司守尚書令秦王李茂貞依前封秦王餘如故仍

賜不拜不名

五代會要太常禮院奏李茂貞封冊之命宜準故襄州節度使趙匡凝之例施行秦

王受冊自備革輅一乘載冊轎車是日帝幸左龍武軍

一乘并本品鹵簿鼓吹如儀從之癸未宰臣豆盧革率百官上表請立中宮制以魏國夫

人劉氏爲皇后仍令所司擇日備禮冊命丁亥以天平

軍節度使蕃漢總管副使開府儀同三司檢校太傅兼

中書令李嗣源爲檢校太尉依前天平軍節度使加實

封百戶並賜鐵券以前安國軍節度副使檢校太保左

衛上將軍李存乂爲晉州節度使檢校太傅以北京皇

城畱守檢校太保左威衛上將軍李存紀爲邢州節度

使加檢校太傅以蕃漢馬步都虞候兼東京馬步軍都

指揮使檢校太保朱守殷爲振武節度使加檢校太傅

戊子以前右龍武軍都虞候守左龍武大將軍李紹奇

爲鄭州防禦使以楚州防禦使張繼孫爲汝州防禦使

己丑以振武軍節度使權安義畱後檢校太傅平章事

李存霸爲潞州節度使以捧日都指揮使鄭州防禦使

李紹琛爲陝州節度使以成德軍馬步軍都指揮使右

監門衛大將軍毛璋爲華州節度使壬辰樞密使郭崇

韜再上表請退樞密之職優詔不允癸巳詔曰皇太后

母儀天下子視羣生當別建宮闈顯標名號冀因稱謂

益表尊嚴宜以長壽宮爲名樞密使郭崇韜奏時務利

便一十五件優詔褒美甲午奚王李紹威吐渾李紹魯
皆貢駝馬丁酉以武安軍衙內馬步軍都指揮使昭州
刺史馬希範爲永州刺史檢校太保癸卯以光祿大夫
檢校左僕射行太常卿李燕爲特進檢校司空依前太
常卿以御史中丞李德休爲兵部侍郎以吏部侍郎崔
協爲御史中丞三月甲辰故河陽節度使王師範贈太
尉乙巳以滄州節度使檢校太傅同平章事符習爲青
州節度使以北京衙內馬步軍都指揮使右領軍衛大
將軍李紹斌爲滄州節度使鎮州奏契丹犯塞詔李嗣
源率師屯邢州丙午以荆南節度使守中書令渤海王

高季興依前檢校太師兼尚書令封南平王以幽州節
度行軍司馬李存賢依前檢校太保爲幽州節度使中
書門下上言近以諸州奏薦令錄頗亂規程請今後節
度使管三州已上每年許奏管內官三人如管三州已
下只奏兩人仍須課績尤異方得上聞防禦使止許奏
一人刺史無奏薦之例從之己酉以太子少保李琪爲
刑部尚書庚戌幽州奏契丹寇新城是日詔諸軍將校
自檢校司空已下宜賜叶謀定亂匡國功臣自檢校僕
射尚書常侍及諫議大夫並賜忠果拱衛功臣初帶憲
銜者並賜忠烈功臣節級長行並賜扈蹕功臣中書門

下上言州縣官在任考滿卽具關申送吏部格式本道不得差攝官替正官從之

五代會要同光二年中書門下奏刺史縣令有政績尤異

為衆所知或招復戶口能增加賦稅者或辨雪冤獄能拯人命者或去害物之積弊立利世之新規有益時政為衆所推者卽仰本處逐件分明聞奏當議獎擢或在任貪猥誅戮生靈公事不治為政怠惰亦加懲罰其州縣官任滿三考卽具關申送吏部格式候勅有司上言除銓注其本道不得差攝官替正授者從之

皇帝四月一日御文明殿受冊徽號合服袞冕御殿前

一日散齋于內殿從之是日李嗣源上表乞退兵權詔

不允是時伶人景進用事闔官競進故重臣憂懼拜章

請退癸丑左諫議大夫竇專上言請廢租庸使名目事

歸三司疏奏不報唐州奏木連理詔先省員官除已別

授官外其左散騎常侍李文矩等三十人却復舊官太

子詹事石戩等五人宜以本官致仕將作少監岑保嗣

等十四人續勅處分丙辰責授萊州司戶鄭珏等一十

一人並量移近地尚書戶部侍郎知貢舉趙頊卒以中

書舍人裴皞權知貢舉禁用鉛錫錢丁巳中書門下奏

懿祖陵請以永興為名獻祖陵請以長寧為名太祖陵

請以建極為名從之淮南楊溥遣使貢賀郊天禮物

十國

春秋吳世家王遣右衛上將軍許確進賀郊天銀二千兩錦綺羅一千二百疋細茶五百斤象牙四株犀角十


株于唐 戊午詔應南郊行事官並付三銓磨勘優與處分

已未以大理卿張紹珪充制置安邑解縣兩池權鹽使

幸左龍武軍以皇子繼岌代張全義判六軍諸衛事故也癸亥以彰武保大等軍節度使北平王高萬興可依前延州鄜州節度使檢校太保兼中書令北平王甲子幸東宅夏四月己巳朔帝御文明殿具袞冕受冊尊號曰昭文睿武至德光孝皇帝壬申以成德軍節度行軍司馬權知府事任圜爲檢校右僕射權北面水陸轉運制置使甲戌以順義軍留後華溫琪依前檢校太保充留後乙亥以天策上將軍武安等軍節度使守太師中書令楚王馬殷可依前守太師兼尚書令詔在京諸道節度使刺史令各歸本任丁丑以前幽州節度使內外

蕃漢馬步總管檢校太師兼中書令李存審爲宣武軍節度使餘如故己卯帝御文明殿冊魏國夫人劉氏爲皇后庚辰賜郭彥威姓名曰紹真癸未以宋州節度使李繼安依前檢校太尉同平章事宋州節度使以許州節度使李繼冲依前檢校太尉同平章事許州節度使以襄州節度使孔勅依前檢校太傅同平章事襄州節度使甲午以樞密副使通議大夫行內侍省內侍宋唐玉爲左監門衛將軍同正依前樞密副使以內客省使通議大夫行內侍省內侍楊希朗爲右監門衛將軍同正依前內客省使並賜推忠匡佐功臣車駕幸龍門丙

成回鶻遣使貢方物己丑以夏州節度使李仁福依前
檢校太師兼中書令夏州節度使封朔方王以朔方河
西等軍節度使韓洙依前檢校太傅兼侍中充朔方河
西等軍節度使靈鹽威警雄涼甘肅等州觀察使辛卯
以宣徽南院使判內侍省兼內局特進左監門將軍同
正李紹宏爲右領軍衛上將軍癸巳以靜江軍節度使
扶風郡王馬竇爲檢校太師兼中書令依前靜江軍節
度使以朗州節度使馬希振爲檢校太傅兼侍中依前
朗州節度使鳳翔節度使秦王李茂貞薨丙申潞州小
校楊立據城叛以李嗣源爲招討使陝州留後李紹真
爲副率師以討之



舊五代史卷三十一

舊五代史卷三十一 攷證

唐莊宗紀五開府儀同三司守尚書令秦王李茂貞

秦王通鑑作岐王

鎮州奏契丹犯塞詔李嗣源率師屯邢州 案通鑑詔

橫海節度使李紹斌北京指揮使李從珂帥騎兵分

道備之與是書異

靈鹽威警雄京甘肅等州觀察使 案威警疑當作威

涇攻通鑑注云警州在涇原西今仍其舊

舊五代史卷三十一攷證

舊五代史卷三十一

宋門下侍郎參知政事監修國史薛居正等撰

唐書第八

莊宗紀六

同光二年夏五月己亥帝御文明殿冊齊王張全義爲太尉禮畢全義赴尚書省領事左諫議大夫竇專不降階爲御史所劾專援引舊典宰相不能詰寢而不行庚子太常卿李燕卒壬寅以教坊使陳俊爲景州刺史內園使儲德源爲憲州刺史皆梁之伶人也初帝平梁俊與德源皆爲寵伶周匝所薦帝因許除郡郭崇韜以爲

不可伶官言之者衆帝密召崇韜謂之曰予已許除郡

經年未行我慙見二人卿當屈意行之故有是命清異錄同

光旣卽位猶襲故態身預俳優尚方進御中裹各品日新今伶人所頂尚有傳其遺製者甲辰以兗

州節度使李紹欽依前檢校太保兗州節度使進封開

國侯以邠州節度使韓恭依前檢校太保邠州節度使

進封開國伯丙午以福建節度使閩王王審知依前檢

校太師守中書令福建節度使戊申幸郭崇韜第己酉

詔天下收拆防城之具不得修濬池隍以西都畱守京

兆尹張筠依前檢校太保充西都畱守甲寅以滄州節

度使李紹斌充東北面招討使以兗州節度李紹欽爲

副招討使以宣徽使李紹宏爲招討都監率大軍渡河

而北時幽州上言契丹將寇河朔故也乙卯潞州叛將

楊立遣使健步奉表乞行赦宥帝令樞密副使宋唐玉

賫勅書招撫幽州上言契丹營于州東南丙辰渤海國

王大誣譏遣使貢方物以澶州刺史李審益爲幽州行

軍司馬蕃漢內外都知兵馬使辛酉故澤潞節度使丁

會贈太師詔割復州爲荆南屬郡壬戌以權知鳳翔軍

府事涇州節度使李曦爲起復雲麾將軍右金吾大將

軍同正依前檢校太尉兼中書令充鳳翔節度使乙丑

以權知歸義軍畱後曹義金爲歸義軍節度使沙州刺

史檢校司空丙寅李嗣源奏收復潞州幽州上言新授
宣武軍節度使李存審卒六月甲戌中書侍郎兼吏部
尚書平章事宏文館大學士豆盧革加右僕射餘如故
侍中監修國史兼樞密使鎮州節度使郭崇韜進爵邑
加功臣號中書侍郎平章事集賢殿大學士趙光允加
兼戶部尚書禮部侍郎平章事韋說加中書侍郎宋州
秦節度使李紹安卒丙子李嗣源遣使部送潞州叛將
楊立等到闕並磔于市潞州城峻而隍深至是帝命剗
平之因詔諸方鎮撤防城之備焉丁丑有司上言洛陽
已建宗廟其北京太廟請停從之甲申以衛國夫人韓

氏爲淑妃燕國夫人伊氏爲德妃仍令所司擇日冊命
故河東節度副使守左諫議大夫李襲吉贈禮部尚書
故河東節度副使禮部尚書蘇循贈左僕射故河東觀
察判官檢校右僕射司馬揆贈司空故河東畱守判官
工部尚書李敬義贈右僕射丙戌以順義軍節度使李
令錫爲許州節度使以前保義軍畱後李紹眞爲徐州
節度使以徐州節度使李紹榮爲宋州節度使戊子汝
州防禦使張繼孫賜死于本郡繼孫卽齊王張全義之
假子也本姓郝氏爲兄繼業等訟其陰事故誅之

冊府元龜

載張繼業爲河陽兩使畱後莊宗同光二年六月繼業
上疏稱弟繼孫本姓郝有母尚在父全義養爲假子令

管衙內兵士自皇帝到京繼孫私藏兵甲招置部曲欲圖不軌兼私家淫縱無別無義臣若不陳恐累家族勅曰有善必賞所以勸忠孝之方有惡必誅所以絕姦邪之迹其或罪狀騰于眾口醜行布于近親須舉朝章冀明國法汝州防禦使張繼孫本非張氏子孫自小巧養以至成立備極顯榮而不酬撫育之恩履謙恭之道擅行威福常恣姦克所不忍言無賴者實為其黨而又畜梟獍之心有識者所不忍言無賴者實為其黨而又橫征暴斂虐法峻刑藏兵器于私家殺平人于廣陌罔思俊改難議矜容宜竄逐于還方仍還歸于姓氏俾我勳賢之族永除污穢之風凡百臣僚宜體朕命可貶房州司戶參軍同正兼勒復本姓尋賜自盡仍籍沒資產

已丑以回鶻可汗仁美為英義可汗詔改輝州為單州

庚寅故左僕射裴樞右僕射裴贄崔遠並贈司徒故靜海軍節度使獨孤損贈司空故吏部尚書陸展贈右僕射故工部尚書王溥贈右僕射裴樞等六人皆前朝宰

輔為梁祖所害于白馬驛至是追贈焉壬辰以天平軍節度使蕃漢總管副使開府儀同三司檢校太尉兼中書令李嗣源為宣武軍節度使蕃漢馬步總管餘如故甲午以樞密使特進左領軍衛上將軍知內侍省事張居翰為驃騎大將軍守左驍衛上將軍進封開國伯賜功臣號秋七月戊戌朔故宣武軍節度使李存審男彥超進其父牙兵八千七百人己亥中書門下奏每年南郊壇四祠祭太微宮五薦獻壇宰臣攝太尉行事惟太廟遣庶僚行事此後太廟祠祭亦望差宰臣行事從之乙巳汴州雍邱縣大風拔木傷稼曹州大雨平地水三

尺丙午以襄州節度使孔勅爲潞州節度使李存霸爲
鄆州節度使乙酉幸龍門之雷山祭天神從北俗之舊
事也辛亥以鄆州副使李紹珙爲襄州留後以前澤州
刺史董璋爲邠州留後戊午西川王衍遣僞署戶部侍
郎歐陽彬來朝貢稱大蜀皇帝土書大唐皇帝庚申以
應州爲雲州屬郡升新州爲威塞軍節度使以媯儒武
等州爲屬郡壬戌皇子繼岌妻王氏封魏國夫人幽州
奏契丹安巴堅東攻渤海八月己巳詔洛京應有隙地
任人請射修造有主者限半年令本主自修蓋如過限
不見屋宇許他人占射

五代會要載此詔云藩方侯伯
內外臣僚于京邑之中無安居

之所亦可請
射各自修營

辛未北京副留守太原尹孟知祥加檢校

太傅增邑賜功臣號帝畋于西苑癸酉以租庸副使守
衛尉卿孔謙爲租庸使以右威衛上將軍孔循爲租庸
副使甲戌以權知汴州軍州事翰林學士承旨戶部尚
書盧質爲兵部尚書依前翰林學士承旨仍賜論思匡
佐功臣丙子以雲州刺史鴈門以北都知兵馬使安元
信爲大同軍節度留後以隰州刺史張廷裕爲新州威
塞軍節度留後丁丑樞密使郭崇韜上表請退不允戊
寅租庸使守禮部尚書王正言罷使守本官辛巳詔諸
道節度觀察防禦團練使刺史竝于洛陽修宅一區中

書門下上言請今後諸道除節度副使兩使判官外其

餘職員并諸州軍事判官各任本處奏辟從之五代會

二年八月八日中書門下奏諸道除節度使及兩使判

官除授外其餘職員并軍事判官伏以翹車著詠棗帛

垂文式重弓旌以光尊俎由是副已知之薦成接士之

榮必當備悉行藏習知才行允奉幕中之畫以稱席二

之珍爰自偽梁虜垂斯義皆從除授以佐藩宣因緣多

事之秋慮爽得人選將期推擇式示更張今後諸道

除節度副使判官兩使除授外其餘職員并諸州軍事

判官等竝任本道本州各當辟舉其餘軍事判官仍不在

奏官之限汴州奏大水損稼癸未租庸使孔謙進封會稽縣

男仍賜豐財贍國功臣淮南楊溥遣使貢方物宋州大

水鄆曹等州大風雨損稼丁亥中書門下侍郎奏請差

左丞崔沂吏部侍郎崔貽孫給事中鄭韜光李光序吏

部員外郎盧損等同詳定選司長定格循資格十道圖

從之五代會要同光二年八月中書門下奏吏部三銓

長定格循資格十道圖等前件格式流外銓等司公事竝繫

濫倫叙官資頗謂精詳人同遵守自亂離之後巧偽滋

多兼同光二年八月車駕在東京權判工部員外郎盧

重本司起請一卷竝以興復之始務切懷來凡有條流

多失根本以至冬集赴選人竝南郊行事官及陪位宗

子共一千三百餘人銓曹檢勘之時互有援引去留之

際不絕爭論若又依違必長訛濫望差權判尚書省銓

左丞崔沂吏部侍郎崔貽孫給事中鄭韜光李光序吏

部員外郎盧損等同詳定舊長定格循癸巳放朝參三

資格十道圖務令簡要可久施行從之

日以霖雨故也陝州奏河水溢岸乙未中書門下上言

諸陵臺令丞請停以本縣令知陵臺事從之九月癸卯

改于西北郊幽州上言契丹安巴堅自渤海國迴軍內

園新殿成名曰長春殿戊申以中書舍人權知貢舉裴
皞爲禮部侍郎以前鄭州防禦副使姜宏道爲太僕卿
侍中郭崇韜奏應三銓注授官員等內有自無出身入
仕買覓鬼名告敕今將骨肉文書措改姓名或歷任不
足妄稱失墜或假人蔭緒託形勢論屬安排參選所司
隨例注官如有人陳告特議超獎其所犯人檢格處分
若同保人內有僞濫者竝當駁放應有人身死之處今
後竝須申報本州于告身上批書身死月日分明付子
孫今後銓司公事至春末竝須了畢從之銓綜之司僞
濫日久及崇韜條奏之後澄汰甚嚴放棄者十有七八

衆情亦怨之巳酉司天臺請禁私歷日從之庚戌有司
自契丹至者言女真回鶻黃頭室韋合勢侵契丹壬子
有司上言八月二十二日夜熒惑犯星二度星周分也
請依法禳之于京城四門懸東流水一罌兼令都市嚴
備盜火止絕夜行從之甲寅辛郭崇韜第置酒作樂乙
卯以前振武節度使安北都護馬存可依前檢校太尉
兼侍中充寧遠軍節度容管觀察使存湖南馬殷之弟
也丙辰黑水國遣使朝貢契丹寇幽州戊午宣宰臣于
中書磨勘吏部選人謬濫者焚毀告勅冬十月戊辰帝
畋于西北郊巳巳故安義節度使贈太尉隴西郡王李

嗣昭贈太師庚午正衙命使冊淑妃韓氏德妃伊氏以
宰臣豆盧革韋說充冊使辛未詔今後支郡公事須申
本道騰狀奏聞租庸使各有徵催祗牒觀察使貴全理
體契丹寇易定北鄙壬申故大將軍防禦使李存璋贈
太尉鄆州奏清河泛溢壞廬舍癸未畋于石橋甲戌河
南尹張全義上言萬壽節日請于嵩山開瑠璃戒壇度
僧百人從之乙亥故守太師尚書令秦王李茂貞追封
秦王賜諡曰忠敬丁丑皇后差使賜兗州節度使李紹
欽湯藥時皇太后行誥命皇后劉氏行教命互遣使人
宣達藩后紊亂之弊人不敢言己卯汴鄆二州奏大水

庚辰以前太僕卿楊邁爲大理卿党項進曰驢奚王李
紹威進駝馬幽州奏契丹入寇至近郊辛巳故天雄軍
節度副使王緘贈司空壬午以天下兵馬都元帥尚父
守尚書令吳越國王錢鏐可依前天下兵馬都元帥尚
父守尚書令封吳越國王癸未幸小馬坊闕馬甲申以
兩浙兵馬畱後清海軍節度嶺南東道觀察等使守太
尉兼侍中廣州刺史錢元瓘爲檢校太師兼中書令充
兩浙節度觀察畱後餘如故以鎮東軍節度副大使江
南管內都招討使建武軍節度嶺南西道觀察等使檢
校太傅守侍中知蘇州中吳軍軍州事行邕州刺史錢

元瑋爲檢校太尉兼中書令餘如故辛卯天平軍監軍使柴重厚可特進右領衛將軍同正充鳳翔監軍使甲午以宣武軍節度押牙李從溫李從璋李從榮李從厚李從璨竝銀青光祿大夫檢校右散騎常侍兼御史大夫宣武軍節度押牙李從臻可檢校國子祭酒兼御史中丞自從溫而下皆李嗣源諸子也十一月丙申靈武奏甘州回鶻可汗仁美卒其弟狄銀權主國事吐渾白都督族帳移于代州東南己亥幸六宅宴諸弟壬寅尚書左丞判吏部尚書銓事崔沂貶麟州司馬吏部侍郎崔貽孫貶朔州司馬給事中鄭韜光貶寧州司馬吏部

員外盧損貶府州司戶時有選人吳延皓取亡叔告身故舊名求仕事發延皓付河南府處死崔沂己下貶官宰相豆盧革趙光允韋說詣閣門待罪詔釋之癸卯帝畋于伊闕侍衛金槍馬萬餘騎從帝一發中大鹿是日命從官拜梁祖之陵物議非之其夕宿于張全義之別墅甲辰宿伊闕縣乙巳宿樵澗時騎士圍山會夜顛墜崖谷死傷甚衆丙午復命衛兵分獵殺獲萬計是夜方歸京城六街火炬如晝丁未賜羣臣鹿肉有差庚戌制改節將一十一人功臣號辛亥以兵部侍郎李德休爲吏部侍郎壬子日南至百官拜表稱賀以昭儀侯氏爲

汧國夫人昭容夏氏爲虢國夫人昭媛白氏爲沛國夫人出使美宣鄧氏爲魏國夫人御正楚眞張氏爲涼國夫人司簿德美周氏爲宋國夫人侍眞吳氏爲渤海郡夫人其餘竝封郡夫人丁巳河中節度使守太師兼尚書令西平王李繼麟可依前守太師兼尚書令河中護國軍節度使西平王仍賜鐵券戊午幸李嗣源李紹榮之第縱酒作樂是日鎮州地震契丹寇蔚州十二月戊辰幸西苑校獵已巳詔汴州節度使李嗣源歸鎮通鑑云已巳命宣武節度使李嗣源將宿衛兵三萬七千人赴汴州遂如幽州禦契丹庚午帝與皇后劉氏幸張全義第酒酣帝命皇后拜全義爲養父全義

惶恐致謝復出珍貨貢獻翼日皇后傳制命學士草謝全義書學士趙鳳密疏陳國后無拜人臣爲父之禮帝雖嘉之竟不能已其事壬申以教坊使王承顏爲興州刺史丙子詔取來年正月七日幸魏州庚辰畋于近郊至夕還宮壬午契丹寇嵐州党項遣使貢方物乙酉幸龍門佛寺祈雪丙戌以徐州節度使李紹眞爲北面行營副招討使戊子李嗣源奏部署大軍自宣武軍北征淮南楊溥遣使貢獻已丑幸龍門庚寅詔河南尹張全義爲洛京畱守判在京諸軍事是日日傍有背氣凡十

二

同光三年春正月甲午朔帝御明堂殿受朝賀仗衛如式丙申詔以昭宗少帝山陵未備宜令有司別選園陵改葬尋以年饑財匱而止契丹寇幽州戊戌詔起今後特恩授官及侍衛諸軍將校內諸司等官其告身官給舊例朱膠錢臺省禮錢竝停其餘合徵臺省禮錢比舊數五分中許徵一分特恩者不徵兵吏部兩司逐月各支錢四十貫文充吏人食直少府監鑄錢造印文今後不得徵納銅炭價直其料物官給庚子車駕發京師幸鄴以前許州節度使李紹冲爲太子少保以前邠州節度使韓恭爲右金吾大將軍充兩街使以前安州節度

使朱漢賓爲左龍武統軍庚戌車駕至鄴命青州節度使符習修酸棗河隄先是梁末帝次河隄引水東注至鄆濮以限我軍至是方修之丙辰幽州上言節度使李存賢卒二月甲子朔詔興唐府管內有百姓隨絲鹽錢每兩與減五十文逐年所俵蠶鹽每斗與減五十文小菜豆稅每畝與減放三升都城內所徵稅絲永與除放丙寅定州節度使王都來朝丁卯畋于近郊己巳召從臣擊毬于鞠場辛未許州上言襄城葉縣準勅割隸汝州其扶溝等縣請卻隸當州從之甲戌以滄州節度使李紹斌爲幽州節度使依前檢校太保以大同軍畱後

安元信爲滄州節度使乙亥幸王莽河射鴈丙子李嗣源奏涿州東南殺敗契丹生擒首領三十人符習奏修隄役夫遇雪寒逃散樞密使郭崇韜上表辭兼鎮時帝命李紹斌鎮幽州以其時望未重欲以李嗣源爲鎮帥且爲紹斌聲援移郭崇韜兼領汴州召崇韜議之崇韜奏以爲當因懇辭兼領庚辰以宣武軍節度使李嗣源爲鎮州節度使辛巳以皇子繼潼繼嵩繼蟾繼曉竝檢校司徒皆冲幼未出閣突厥渤海國皆遣使貢方物帝幸近郊射鴈甲申以樞密使郭崇韜爲依前守侍中監修國史兼樞密使加食邑實封廣南劉巖遣使奉書于

帝稱大漢國王致書上大唐皇帝乙酉帝射鴨于郭泊丙戌定州節度使檢校太尉兼侍中王都進封開國公加食邑實封戊子幸近郊射鴈工部尚書崔柅卒贈右僕射三月癸巳朔賜扈從諸軍將士優給自二十千至一千甲午振武軍節度使洛京內外蕃漢馬步使朱守殷奏昨修月陂隄至德宮南獲玉璽七紐獻之詔示百官驗其文曰皇帝行寶四字方圓八寸厚二寸背紐交龍光瑩精妙守殷又于役所得古文錢四百六十六內二十六文曰得一元寶四百四十曰順天元寶上之麗元

英文昌雜錄云同光三年洛京積善坊得古文錢曰得一元寶順天元寶史不載何代鑄錢近見錢氏錢譜云

史思明再陷洛陽鑄得一錢賊黨以爲得一非佳號乃改順天蓋史思明所鑄錢也

丙子寒食節帝與皇后出近郊遙饗代州親廟庚子詔取三月十七日車駕歸洛京壬寅符習奏修河隄畢功戊申帝召郭崇韜謂曰朕思在德勝寨時霍彥威段凝皆子之勍敵終日格鬪戰聲相聞安知二年之間在吾廡下吾無少康光武之才一旦重興基構者良由二三勲德同心輔翼故也朕有時夢寢如在戚城思念曩時挑戰鏖兵勞則勞矣然而揚旌伐鼓差慰人心殘壘荒溝依然在目予欲按德勝故寨與卿再陳舊事崇韜曰此去澶州不遠陛下再觀戰地益知王業之艱難豈不躓哉已酉車

駕發鄴宮辛亥至德勝城登城四望指戰陣之處以諭宰臣渡河南觀廢柵舊址至楊村寨沿河至戚城置酒作樂而罷壬子淮南楊溥遣使朝貢東京副畱守張憲奏諸營家口一千二百人逃亡以艱食故也時官苑使王允平伶人景進爲帝廣采官人不擇良家委巷殆千餘人車駕不給載以牛車纍纍于路焉庚辰車駕至自鄴辛酉詔本朝以雍州爲西京洛州爲東都并州爲北都近以魏州爲東京宜依舊以洛京爲東都魏州改爲鄴都與北都並爲次府夏四月癸亥朔日有食之以租庸副使孔循權知汴州軍州事丙寅淮南楊溥遣使貢

方物壬申幸甘泉亭癸酉詔翰林學士承旨盧質覆試
新及第進士五代會要時以新及第進士符蒙
正等尚干浮議故命盧質覆試租庸使

奏時雨久愆請下諸道州府依法祈禱從之乙亥帝與

皇后幸郭崇韜第又幸左龍武統軍朱漢賓之第戊寅

以耀州為團練州其順義軍額宜停庚辰帝侍皇太后

幸會節園遂幸李紹榮之第辛巳以旱甚詔河南府徙

市造五方龍集巫禱祭癸未以兗州節度使李紹欽為

鄧州節度使丁亥以鎮州節度使李嗣源兼北面水陸

轉運使以徐州節度使李紹真為副禮部貢院新及第

進士四人其王澈改為第一桑維翰第二符蒙正第三

成僚第四禮部侍郎裴皞既無黜落特議寬容今後新

及第人候過堂日委中書門下精加詳覆陝州奏木連

理庚寅中書侍郎兼工部尚書平章事趙光允卒廢朝

三日五月壬辰朔淮南楊溥貢端午節物丁酉皇太妃

劉氏薨于晉陽廢朝五日帝于興安殿行服時皇太后

欲奔喪于晉陽百官上表請畱乃止戊戌以鎮州行軍

司馬知軍府事任圜為工部尚書戊申幸龍門廣化寺

祈雨已酉黑水女真二國皆遣使朝貢戊午以鳳州衙

內馬步軍都指揮使李繼昶為涇州節度使檢校太傅

已未詔天下見禁罪人如無大過者速令疎放幸太清

宮禱雨六月癸亥雲州上言去年契丹從磧北歸帳達
鞞因相掩擊其首領裕悅族帳自磧北以部族羊馬三
萬來降已到南界今差使人來赴闕奏事甲子太白晝
見丁卯以滄州節度使安元信充北面行營馬步軍都
排陣使辛未以宗正卿李紆充昭宗少帝改卜園陵使
壬申京師雨足自是大雨至于九月晝夜陰晦未嘗澄
霽江河漂溢隄防壞決天下皆訴水災丁丑詔吳越王
錢鏐將行冊禮準禮文合用竹冊宜令所司修製玉冊
時郭崇韜秉政以爲不可樞密承旨段徊贊其事故有
是命癸丑以天德軍節度使管內蕃漢都知兵馬使劉

承訓爲天德軍節度觀察畱後丙戌詔曰關內諸陵頃

因喪亂例遭穿穴冬未掩修其下宮殿宇法物等各令

奉陵州府據所管陵園修製仍四時各依舊例薦饗每

陵仰差近陵百姓二十戶充陵戶以備灑掃其壽陵等

一十陵亦一例修掩量置陵戶戊子以刑部尚書李琪

充昭宗少帝改卜園陵禮儀使己丑以工部郎中李途

爲京北少尹充修奉諸陵使辛卯詔括天下私馬五代

會要詔下河南河北諸州和市戰

馬官吏除一匹外匿者坐罪將收蜀故也三楚新錄莊

宗謂高季興曰今天下負固不服者惟吳蜀耳朕欲先有事于蜀而

蜀地險阻尤難江南才隔荆南一水朕欲先之卿以爲
何如季興對曰臣聞蜀地富民饒獲之可建大利江南
國貧地狹民少得之恐無益臣願陛下釋吳先蜀時莊

宗意亦欲伐蜀及聞
季興之言果大悅

舊五代史卷三十二

舊五代史卷三十二攷證

唐莊宗紀六內園使 案歐陽史作內園栽接使攷五代會要內園栽接使係梁時雜使創置之官

契丹安巴堅東攻渤海 案遼史太祖紀天贊三年五

月渤海殺其刺史張秀實而掠其民于東攻渤海之事闕而不載攷五代會要同光二年七月契丹東攻渤海與是書同

每兩與減五十文 案五代會要作每兩與減放五文

已酉車駕發鄴宮辛亥至德勝城 案五代春秋作庚


子帝幸鄴都遂幸德勝故城據是書則已酉發鄴宮

辛亥至德勝城與五代春秋異蓋五代春秋祇以詔
下之日爲據也


庚辰車駕至自鄴 庚辰歐陽史作庚申攷通鑑及五
代春秋皆作庚辰據上文正月甲午朔二月甲子朔
三月癸巳朔則三月不得有庚辰也蓋其誤始于是
書而通鑑五代春秋皆襲其訛耳今姑從原本仍爲
辨正于此

夏四月癸亥朔 案五代春秋作辛亥朔通鑑從是書
中書侍郎兼工部尚書平章事趙光允卒 案是書二
年六月光允加兼戶部尚書此處作工部前後互異
未知孰是

安巴堅舊作阿保機今改 裕悅舊作于越今改



舊五代史卷三十二攷證



舊五代史卷三十二

宋門下侍郎參知政事監修國史薛居正等撰

唐書第九

莊宗紀七

同光三年秋七月丁酉以久雨詔河南府依法祈晴滑
州上言黃河決壬寅皇太后崩于長壽宮帝執喪于內
出遺令以示于外癸卯帝于長壽宮成服百官于長壽
宮幕次成服後于殿前立班奉慰乙巳宰臣上表請聽
政不允表再上勅旨宜廢朝七日丁未宏文館上言請
依六典改宏文館爲崇文館從之時樞密使郭崇韜亡

父名宏豆盧革希崇韜指奏而改之

五代會要同光三年勅云崇文館比

與宏文館並置今請改稱頌協舊典蓋豆盧革曲爲之說也

洛水泛漲壞天津橋以

舟濟渡日有覆溺者已酉宰臣百官上表請聽政又請復常膳表凡三上以刑部尚書李琪充大行皇太后山陵禮儀使河南尹張全義充山陵橋道排頓使孔謙充監護使壬子河陽陝州上言河溢岸以禮部尚書王正言爲戶部尚書以御史中丞崔協爲禮部尚書以刑部侍郎史館修撰判館事崔居儉爲御史中丞以尚書左丞歸藹爲刑部侍郎陝州上言河漲二丈二尺壞浮橋入城門居人有溺死者乙卯汴州上言汴水泛漲恐漂

沒城池于州城東西權開壕口引水入古河澤潞上言自今月一日雨至十九日未止戊午以刑部尚書判太常卿兼判吏部尚書銓事李琪爲吏部尚書依前判太常卿以兵部侍郎集賢殿學士判院事盧文紀爲吏部侍郎以給事中李光序爲尚書右丞許州滑州奏大水八月壬戌詔諸司人吏不許諸處奏薦如有勞績只許本司奏聞詔有司吳越王印宜以黃金鑄成其文曰吳越國王之印丁卯帝釋服百官奉慰于長壽宮戊辰客省使李嚴使蜀迴初帝令往市蜀中珍玩蜀法嚴峻不許奇貨東出其許市者謂之入草物嚴不獲珍貨歸而

奏之帝大怒曰物歸中夏者命之曰入草王衍寧免爲入草之人耶由是伐蜀之意銳矣庚辰幸壽安山陵作所鄴都大水御河泛溢癸未河南縣令羅貫長流崖州尋委河南府決痛杖一頓處死坐部內橋道不修故也及死人皆寃之甲申山陵禮儀使奏山陵封城之內先有邱墳合令子孫改卜舊例給其所費無子孫者官爲瘞藏如是五品以上官所司仍以禮致祭從之鳳翔奏大水已酉中書門下上言據禮儀使狀準故事太常少卿定大行太后諡議太常卿署定訖告天地宗廟伏準禮文賤不得誅貴子不得爵母后必諡于廟者受成于

祖宗今大行太后諡請太常卿署定後集百官連署諡狀訖讀于太廟太祖皇帝室然後差丞郎一人撰冊文別定日命太尉上諡冊于西宮靈座同日差官告天地太微宮宗廟如常告之儀從之青州大水蝗已丑以襄州畱後李紹珙爲襄州節度使以邠州畱後董璋爲邠州節度使九月辛卯朔河陽奏黃河漲一丈五尺癸巳中書上言大行皇太后諡議合讀于太廟太祖室其日集兩省御史臺五品已上尚書省四品已上諸司三品已上官于太廟序立從之鎮州衛州奏水入城壞廬舍乙未制封第三子鄴都畱守興聖宮使檢校太尉同平

章事判六軍諸衛事繼岌爲魏王幸壽安陵庚子襄州
奏漢江漲溢漂溺廬舍是日命大舉伐蜀詔曰朕夙荷
丕基乍平僞室非不欲寵綏四海協和萬邦庶正朔以
遐同俾人倫之有序其或地居陬裔位極驕奢殊乖事
大之規但蘊偷安之計則必徵諸典訓振以皇威爰興
伐罪之師冀遏亂常之黨蠢茲蜀主世負唐恩間者父
總藩宣任君統制屬朱温東離汴水致昭皇西幸岐陽
不務扶持反懷顧望盜據劔南之土宇全虧閩外之屯
誠先皇帝早在并門將興霸業彼旣會馳書幣此亦復
展謝儀後又特發使人專持聘禮彼則更不迴一介之

使答咫尺之書星歲俄移歡盟頓阻朕頃遵遺訓嗣統
列藩追昔日之來誠繼先皇之舊好累馳信幣皆絕酬
還背惠食言棄同卽異今觀孽豎紹據山河委闔宦以
持權憑阻修而僭號早者會上秦王緘札張皇蜀地聲
塵形侮黷之言辭謗親賢之勳德昨朕風驅銳旅電掃
兇渠復已墜之宗祧纘中興之歷數捷音旋報復命仍
稽使來而尚抗書題情動而先誇險固加以宋光葆輒
陳狂計別啓奸謀將欲北顧秦川東窺荆渚人而無禮
罪莫大焉昨客省使李嚴奉使銅梁近歸金闕凡于奏
對備述端由其宋光嗣相見之時于坐上便有言說先

問契丹強弱次數秦王是非度此包藏可見情狀加以
疏遠忠直朋比奸雄內則縱恣輕華競貪寵位外則滋
彰法令蠹耗生靈旣德力以不量在神祇之共憤今命
興聖宮使魏王繼岌充西川四面行營都統命侍中樞
密使郭崇韜充西川東北面行營都招討制置等使荆
南節度使高季興充西川東南面行營都招討使鳳翔
節度使李暉充供軍轉運應接等使同州節度使李令
德充行營招討副使陝府節度使李紹琛充行營蕃漢
馬步都排陣斬斫使西京畱守張筠充西川管內安撫
應接使華州節度使毛璋充行營左廂馬步都虞候邠

州節度使董璋充行營右廂馬步都虞候客省使李嚴
充西川管內招撫使總領闕下諸軍兼四面諸道馬步
兵士取九月十八日進發凡爾中外宜體朕懷辛丑授
魏王繼岌諸道行營都統餘如故繼岌旣授都統之命
以梁漢顯充中軍馬步都虞候兼馬步軍都指揮使張
廷蘊爲中軍步軍都指揮使牛景章充中軍左廂馬軍
都指揮使沈斌充中軍右廂馬軍都指揮使卓瓌充中
軍左廂步軍都指揮使王贇充中軍右廂步軍都指揮
使供奉官李從襲充中軍馬步軍都監高品李廷安呂
知柔充魏王衙通謁詔工部尚書任圜翰林學士李愚

參魏王軍事丁未夕徧天陰雲北方有聲如雷野雉皆鳴俗所謂天狗落戊申魏王繼岌樞密使侍中郭崇韜進發西征太子少師致仕薛廷珪卒贈右僕射甲寅幸壽安陵司天上言自七月三日大雨至九月十八日後方晴三辰行度不見丁巳幸尖山射鴈冬十月庚申朔宰臣及文武三品以上官赴長壽宮上大行皇太后諡曰貞簡皇太后辛酉幸甘泉遂幸壽安陵壬戌魏王繼岌率師至鳳翔先遣使馳檄以諭蜀部丁卯奉皇太后尊諡寶冊赴西京靈座宰臣豆盧革攝太尉讀冊文吏部尚書李琪讀寶文百官素服班于長壽宮門外奉慰

淮南楊溥遣使進慰禮已巳中書上言貞簡太后陵請

以坤陵爲名從之初卜山陵帝欲祔于代州武皇陵奏

議天子以四海爲家不當分其南北乃于壽安縣界別

卜是陵

五代會要載中書門下奏議云人君以四海爲家不當分其南北洛陽是帝王之宅四時朝拜

禮須便近不能遠幸代州今漢朝諸陵皆近秦雍國朝陵寢布列京畿後魏文帝自代遷洛之後園陵皆在河南兼勅功臣之家不許北葬今魏氏諸陵尚在京畿祔葬代州理未爲允從之丙子以前翰林

學士戶部侍郎馮道依前本官充職戊寅西征之師入

大散關

九國志趙庭隱傳云自入敵境卽禁兵士焚廬舍剽財物蜀人德之僞命鳳州節

度使王承捷故鎮屯駐指揮使唐景思次第迎降得兵

一萬二千軍儲四十萬又下三泉得軍儲三十餘萬自

是師無匱乏軍聲大振辛巳僞興州刺史王承鑿成州
 刺史王承朴棄城遁去康延季大破蜀軍于三泉時王
 衍將幸秦州以其軍五萬屯于利州聞我師至遣步騎
 三萬逆戰于三泉延季與李嚴以勁騎三千擊之蜀軍
 大敗斬首五千級餘衆奔潰王衍聞敗自利州奔歸成
 都斷吉柏津浮梁而去丁亥文武百官上表以貞簡皇
 太后靈駕發引請車駕不至山陵所戍子葬貞簡太后
 于坤陵已丑魏王繼岌至興州僞東川節度使宋光葆
 以梓綿劍龍普五州來降武定軍使王承肇以達蓬壁
 三州來降興元節度使王宗威以梁開通渠麟五州來

降階州刺史王承岳納符印請命秦州節度使王承休

棄城自扶州路奔于西川

太平廣記引王氏見聞記云王承休握銳兵于天水兵刃

不舉既知東軍入蜀遂擁麾下之師及婦女孩幼萬餘口金銀繒帛于西蕃買路歸蜀沿路爲西蕃擄奪凍餓相踐而死迨至蜀存者百餘人唯與田宗洎等脫身而至魏王使人問之曰親握重兵何得不戰曰畏大王神武不敢當其鋒曰何不早降曰蓋緣王師不入封部無門納款曰初入蕃部幾許人曰萬餘口今存者幾何曰纔及百數魏王曰汝可償萬人之命遂斬之

十一月庚寅朔帝幸壽安號慟

于坤陵戊戌以振武節度使朱守殷爲兗州節度使徐

州鄴都上言十月二十五日夜地大震康延季至利州

修吉柏津浮梁僞昭武軍節度使林思諤來降辛丑魏
 王過利州帝賜王衍詔諭以禍福甲辰魏王至劍州僞

武信軍節度使王宗壽以遂合渝瀘忠五州來降丁未
 高麗國遣使貢方物康延季李嚴至漢州王衍遣人送
 牛酒請降李嚴遂先入成都戊申耐貞簡皇太后神主
 于太廟己酉魏王至綿州王衍遣使上牋歸命庚戌皇
 弟鄆州節度使存霸滑州節度使存渥左金吾大將軍
 晉州節度使存义邢州節度使存紀並授起復雲麾將
 軍右金吾大將軍同正荆南節度使高季興奏收復歸
 夔忠等州辛亥魏王至德陽偽六軍使王宗弼報王衍
 舉家遷于西宅宗弼權稱西川兵馬留後又報偽樞密
 使宋光嗣景潤澄宣徽使李周輅歐陽晃同有異謀惑

亂蜀主已梟斬訖

九國志王宗弼傳唐師陷鳳州衍遣三招討屯三泉以拒唐師未戰三招

討俱遁走因令宗弼守綿谷而誅三招討宗弼遂與三招討同送款于魏王乃還成都斬宋光嗣等函首送于魏王遷衍及母妻于西宮 壬子王衍遣使上表請降癸丑以吳越國

馬步統軍使檢校太傅錢元球為檢校太尉守侍中充
 靜海軍節度使乙卯魏王至西川城北丙辰蜀主王衍
 出降語在衍傳丁巳大軍入成都法令嚴峻市不易肆
 自興師凡七十五日蜀卒得兵士三萬兵仗七百萬糧
 三百五十三萬錢一百九十二萬貫金銀共二十二萬
 兩珠玉犀象二萬紋錦綾羅五十萬得節度州十郡六
 十四縣二百四十九已丑禮儀使奏貞簡皇太后升祔

禮畢一應宗廟伎樂及諸祀並請仍舊從之十二月壬戌以前雲州節度使李存敬爲同州節度使以同州節度使檢校太保同平章事李令德爲遂州節度使以邠州節度使檢校太保董璋爲劍南東川節度副大使知節度事以華州節度使毛璋爲邠州節度使以左金吾大將軍史敬鎔爲華州節度使丁卯以武寧軍節度副使李紹文爲兗州觀察畱後庚午宴諸王武臣于長春殿始用樂丙子以北京副畱守太原尹孟知祥爲檢校太傅同平章事成都尹劍南西川節度副大使知節度事西山八國雲南都招撫等使以戶部尚書王正言爲

檢校吏部尚書守興唐尹充鄴都副畱守以鄴都副畱守興唐尹張憲檢校吏部尚書太原尹充北京副畱守知畱守事己卯以臘辰狩于白沙皇后皇子宮人畢從庚辰次伊闕辛己次潭泊壬午次龕澗癸未還宮是時大雪苦寒吏士有凍踣于路者伊汝之民飢乏尤甚衛兵所至責其供餉旣不能給因壞其什器撤其廬舍而焚之甚于剽劫縣吏畏恐竄避干山谷間甲申出御札示中書門下以今歲水災異常所在人戶流徙以避徵賦關市之征抽納繁碎宜令宰臣商量條奏丙戌第三姑宋氏封義寧大長公主長姊孟氏封瓊華長公主第

十一妹張氏封瑤英長公主閏十二月甲午賜中書門
下詔曰朕聞古先哲王臨御天下上則以無偏無黨爲
至治次則以足食足兵爲遠謀緬惟前修誠可師範朕
纂承鳳歷嗣守鴻圖三載于茲萬幾是總非不知五兵
未弭兆庶多艱蓋賴卿等寅亮居懷康濟爲務冀盡數
輿之理洞詢盍徹之規今則潛按方區備聆謠俗或力
役罕均其勞逸或賦租莫辨于後先但以督促爲名煩
苛不已被甲胄者何嘗充給趨朝省者轉困支持州閭
之貨殖全疎天地之災祥屢應以至星辰越度旱澇不
時農桑失業于田園道殣相望于郊野生靈及此寢食

寧遑豈非朕德政未孚焦勞自拙者耶朕昨親援毫翰
軫念瘡痍一則詢爾謀猷一則表予宵旰未披來奏轉
撓于懷敢不翼翼罪躬乾乾軫慮咨爾四岳弼予一人
何不舉賢才裨寡昧百辟之內羣后之間莫不有盡忠
者被掩其能抱器者艱陳其力或草澤有遺逸之士山
林多屈滯之人爾所不知吾將安訪卿等位尊調鼎名
顯代天旣逢不諱之朝何恡由衷之說當宜歷告中外
急訪英髦應在仕及前資文武官已下至草澤之士有
濟國治民除姦革弊者並宜各獻封章朕當選擇施行
其近宣御札亦告諭內外體朕意焉是時兩河大水戶

口流亡者十四五都下供饋不充軍士乏食乃有鬻子
去妻老弱採拾于野殍踣于行路者州郡飛輓旋給京
師租庸使孔謙曰于上東門外佇望其來算而給之加
以所在泥潦輦運艱難愁歎之聲盈于道路四方地震
天象乖越帝深憂之問所司濟贍之術孔謙比以吏進
故無保邦濟民之要務唯以急刻賦斂爲事樞密承旨
段徊奏曰臣見本朝時或遇歲時災歉國費不足天子
將求經濟之要則內出朱書御札以訪宰臣請陛下依
此故事行之卽命學士草詞帝親札以訪宰臣非帝憂
民之實也時宰相豆盧革等依阿徇旨竟無所陳但云

陛下威德冠天下今西蜀平定珍寶甚多可以給軍水
旱作沴天之常道不足以貽聖憂中官李紹宏奏曰俟
魏王旋軍之後若兵額漸多饋輓難給請且幸汴州以
便漕輓時羣臣獻議者亦多大較詞理迂闊不中時病
唯吏部尚書李琪引古田租之法從權救弊之道上疏
言之帝優詔以獎之丁酉詔僞蜀私署官員等惟名與
器不可假人況是遐僻偏方僭竊僞署因時亂而濫稱
名位歸國體而悉合剗除但恐當本朝屯否之時有歷
代簪纓之士旣陷彼土遂授僞官又慮有曾受本朝渥
恩當時已居班秩須爲升降不可通同應僞署官至太

師太傅及三少并太尉司徒司空侍中中書令左右僕射已上並宜降至六尚書臨時更約僞署高低爲六行次第階至開府特進金紫者宜令文班降至朝散大夫武班降至銀青爵僞署將相已下與開國男餘並不得更稱封爵其有功臣者削去五代會要云其有功臣名號並宜削去如是僞署節鎮伐罪之初率先向化及立功效者宜委繼岌崇韜臨時獎任其刺史但許稱使君不得更有檢校官其僞署班行正四品以上酌此降黜五品以下如不會經本朝授官若材智有聞卽許于府縣中量材任使如無材智可錄止是蜀地土人並宜放歸田里如是西班

有稱統軍上將軍者若是本朝功臣子孫及將相之嗣並據人材高下與諸衛小將軍府率中郎將次第授任如是小將軍已下據人材堪任使者宜委西川節度使衙前補押衙不堪任使者亦宜放歸田里應已前降官除軍前量事迹任使外餘並稱前衙候朝廷續據才行任使庚子彰武保大等節度使高萬興卒甲辰淮南楊溥遣使朝貢乙巳以晉州節度使李存乂爲鄜州節度使以相州刺史李存確爲晉州節度使丙子兩省諫官上疏請車駕不巡幸汴州凡三上章乃允庚戌魏王繼岌奏遣秦州副使徐藹賫書招諭南詔蠻又奏點到兩

川馬九千五百三十匹
清異錄莊宗滅梁平蜀志頗自
逸命蜀匠織十幅無縫錦爲被
材被成賜
名六合被
辛亥制皇第二弟存霸可封永王第三弟存
美可封邕王第四弟存渥可封申王第五弟存乂可封
睦王第六弟存確可封通王第七弟存紀可封雅王是
歲日旁有背氣凡十三

舊五代史卷三十三

舊五代史卷三十三攷證

唐莊宗紀七禮部尚書王正言
正言原本作直言今
據歐陽史改正

其許市者謂之入草物
入草原本訛全草今據通鑑
及冊府元龜所引薛史改正

鎮州衛州奏
案原本脫鎮州二字今據冊府元龜所
引薛史增入

太子少師致仕薛廷珪卒
少師原本作少保今據列
傳改正

斷吉柏津
吉柏通鑑作桔柏攷歐陽史亦作吉柏今

仍其舊

梁僞昭武軍節度使林思謬來降 思謬原本作世謬

今據通鑑十國春秋改正

僞武信軍節度使王宗壽以遂合渝瀘忠五州來降

案九國志王宗壽傳唐師入境郭崇韜遣使遺宗壽書宗壽不納聞衍降乃治裝赴闕歐陽史蜀世家亦言宗壽獨不降聞衍已衝壁大慟從衍東遷據是書則王衍未送款宗壽已降疑傳聞之誤

丙辰蜀主王衍出降 案王衍出降在十一月丙辰通

鑑與是書同歐陽史作己酉蓋據上牋歸命而先書

之其實己酉唐師尚在綿州未入成都也五代春秋

作十二月蜀王衍降尤誤

辛巳次潭泊壬午次龕澗 潭泊原本訛覃泊龕澗原

本訛寵澗今並從通鑑改正

長姊孟氏封瓊華長公主 案通鑑以瓊華爲克讓女

則莊宗之從姊也隆平集東都事畧孟昶傳並云父知祥尚唐莊宗妹俱與是書異

日于上東門外佇望其來 上東門原本作尚東門據

通鑑注云洛城東面三門中日建春左日上東右日

永春今改正

舊五代史卷三十三攷證
如是西班有稱統軍上將軍者 西班原本作兩班今
據五代會要改正

第七弟存紀可封雅王 雅王原本作睢王攷通鑑及
歐陽史皆作雅王是書宗室傳亦作雅今改正

舊五代史卷三十三攷證

舊五代史卷三十四

宋門下侍郎參知政事監修國史薛居正等撰

唐書第十

莊宗紀八

同光四年春正月戊午朔帝不受朝賀契丹寇渤海王
戊詔以去歲因被災珍物價騰踊自今月三日後避正
殿減膳撤樂以答天譴應去年遭水災州縣秋夏稅賦
並與放免自壬午年已前所欠殘稅及諸色課利已有
勅命放免者尚聞所在却有徵收宜令租庸司切準前
勅處分應京畿內人戶有停貯斛斗者並令減價出糶

如不遵行當令檢括西川王衍父子及僞署將相官吏除已行刑憲外一切釋放天下禁囚除十惡五逆官典犯賊屠牛毀錢放火劫舍持刀殺人者準律常赦不原外應合抵極刑者遞降一等其餘罪犯悉與減降逃背軍健並放逐便癸亥河中節度使李繼麟來朝諸州上言準宣爲去年十月地震集僧道起消災道場甲子魏王繼岌殺樞密使郭崇韜于西川且夷其族丙寅百官上表請復帝膳凡三上表乃允之西川行營都監李廷安進西川樂官二百九十八人契丹寇女真渤海戊寅契丹安巴堅遣使貢良馬庚辰帝異母弟鄜州節度使存乂伏誅存乂郭崇韜之子壻也故亦及于禍是日以河中節度使守太師兼尚書令西平王李繼麟爲滑州節度使尋令朱守殷以兵圍其第誅之亦夷其族辛巳吐渾奚各遣使貢馬鎮州上言部民凍死者七千二百六十人又奏準宣進花果樹栽及抽樂人梅審譯赴京甲申以鄆州節度使王永存霸爲河中節度使以滑州節度使申王存渥爲鄆州節度使乙酉內人景姁上言昭宗遇難之時皇屬千餘人同時遇害爲二穴瘞于宮城西古龍興寺北請改葬從之仍詔河南府監護其事丙戌回鶻可汗阿都欲遣使貢良馬鎮州上言平棘等

四縣部民餓死者二千五十人丁亥詔朱友謙同惡人

史武等七人已當國法並籍沒家產武等友謙舊將時

皆爲刺史並以無罪族誅

歐陽史丁亥殺李繼麟之將史武薛敬容周唐殷楊師太

王景來仁白奉國滅其族

二月己丑以宣徽南院使知內侍省兼內

勾特進右領軍衛上將軍李紹宏爲驃騎大將軍守左

武衛上將軍知內侍省充樞密使甲午以鄭州刺史李

紹奇爲河陽節度使以樂人景進爲銀青光祿大夫檢

校右散騎常侍守御史大夫進以俳優嬖幸善采訪間

巷鄙細事以啟奏復密求妓媵以進恩寵特厚魏州錢

穀諸務及招兵市馬悉委進監臨孔謙附之以希寵常

呼爲八哥諸軍左右無不托附至于士人亦有因之而

求仕進者每入言事左右紛然屏退惟以陷害熒惑爲

意焉是日帝幸冷泉校獵乙未宰臣豆盧革上言請支

州縣官實俸以責課效丙申武德使史產瓊自鄴馳報

稱今月六日貝州屯駐兵士突入都城剽劫坊市初帝

令魏博指揮使楊仁晟率兵戍瓦橋至是代歸有詔令

駐于貝州上歲天下大水十月鄴地大震自是居人或

有亡去他郡者每日族談巷語云城將亂矣人人恐悚

皆不自安十二月以戶部尚書王正言爲興唐尹知雷

守事正言年耄風病事多忽忘比無經治之才武德使

史彥瓊者以伶官得幸帝待以腹心之任都府之中威
福自我正言已下皆脅肩低首曲事不暇由是政無統
攝姦人得以窺圖洎郭崇韜伏誅人未測其禍始皆云
崇韜已殺繼岌自王西川故盡誅郭氏先是有密詔令
史彥瓊殺朱友謙之子澶州刺史建徽史彥瓊夜半出
城不言所往詰旦聞報正言曰史武德夜半馳馬而去
不知何往是日人情震駭訛言云劉皇后以繼岌死于
蜀已行弑逆帝已晏駕故急徵彥瓊其言播于鄴市貝
州軍士有私親寧于都下者掠此言傳于貝州軍士皇
甫暉等因夜聚捕博不勝遂作亂劫都將楊仁晟曰我

輩十有餘年爲國家効命甲不離體已至吞併天下主
上未垂恩澤翻有猜嫌防戍邊遠經年離阻鄉國及得
代歸去家咫尺不令與家屬相見今聞皇后弑逆京邑
已亂將士各欲歸府寧親請公同行仁晟曰汝等何謀
之過耶今英主在上天下一家從駕精兵不下百萬西
平巴蜀威振華夷公等各有家族何事如此軍人乃抽
戈露刃環仁晟曰三軍怨怒咸欲謀反苟不聽從須至
無禮仁晟曰吾非不知此但丈夫舉事當計萬全軍人
卽斬仁晟裨將趙在禮聞軍亂衣不及帶將踰垣而遁
亂兵追及白刃環之曰公能爲帥否則頭隨刃落在

禮懼卽曰吾能爲之衆遂呼譟中夜燔劫貝郡詰旦擁
在禮趨臨清剽永濟館陶五日晚有自貝州來者言亂
兵將犯都城都巡檢使孫鐸等急趨史彥瓊之第告曰
賊將至矣請給鎧仗登陴拒守彥瓊曰今日賊至臨清
計程六日方至爲備未晚孫鐸曰賊來寇我必倍道兼
行一朝失機悔將何及請僕射率衆登陴鐸以勁兵千
人伏于王莽河逆擊之賊旣挫勢須至離潰然後可以
翦除如俟其凶徒薄于城下必慮奸人內應則事未可
測也彥瓊曰但訓士守城何須卽戰時彥瓊疑孫鐸等
有他志故拒之是夜三更賊果攻北門彥瓊時以部衆
在北門樓聞賊呼譟卽時驚潰彥瓊單騎奔京師遲明
亂軍入城孫鐸與之巷戰不勝攜其母自水門而出獲
免晡晚趙在禮引諸軍據宮城署皇甫暉趙進等爲都
虞候斬斫使諸軍大掠興唐尹王正言謁在禮望塵再
拜是日衆推在禮爲兵馬畱後草奏以聞帝怒命宋州
節度使元行欽率騎三千赴鄴都招撫詔徵諸道之師
進討丁酉淮南楊溥遣使賀平蜀己亥魏王繼岌奏康
延孝擁衆反迴寇西川遣副招討使任圜率兵追討之
庚子福建節度副使王延翰奏節度使王審知委權知
軍府事邢州左右步直軍四百人據城叛推軍校趙太

爲留後詔東北面副招討使李紹真率兵討之辛丑元
行欽至鄴都進攻南門以詔書招諭城中趙在禮獻羊
酒勞軍登城遙拜行欽曰將士經年離隔父母不取勅
旨歸寧上貽聖憂追悔何及儻公善爲敷奏俾從渙汗
某等亦不敢不改過自新行欽曰上以汝輩有社稷功
必行赦宥因以詔書諭之皇甫暉聚衆大詬卽壞詔行
欽以聞帝怒曰攻城之日勿遺噍類壬寅行欽自鄴退
軍保澶州甲辰從馬直宿衛軍士王溫等五人夜半謀
亂殺本軍使爲衛兵所擒磔于本軍之門丙午以右散
騎常侍韓彥暉爲戶部侍郎丁未鄴都行營招撫使元

行欽率諸道之師再攻鄴都戊申以洋州留後李紹文
爲夔州節度使詔河中節度使永王存霸歸藩己酉以
樞密使宋唐玉爲特進左威衛上將軍充宣徽南院使
庚戌諸軍大集于鄴都進攻其城不克行欽又大治攻
具城中知其無赦晝夜爲備朝廷聞之益恐連發中使
促繼岌西征之師繼岌以康延孝據漢州中軍之士從
任圓進討繼岌端居利州不獲東歸是日飛龍使顏思
威部署西川宮人至辛亥淮南楊溥遣使貢方物西京
上言客省使李嚴押蜀主王衍至本府壬子以守太尉
中書令河南尹兼河陽節度使齊王張全義爲檢校太

師兼尚書令充許州節度使東川董璋奏準詔誅遂州節度使李令德于本州夷其族癸丑湖南馬殷奏福建節度使王審知疾甚副使王延翰已權知軍府事請降旄節司天監上言自二月上旬後晝夜陰雲不見天象自二十六日方晴至月終星辰無變以右衛上將軍朱漢賓知河南府事甲辰命蕃漢總管李嗣源統親軍赴鄴都以討趙在禮帝素倚愛元行欽鄴城軍亂卽命爲行營招討使久而無功時趙太據邢州王景戡據滄州自爲留後河朔郡邑多殺長吏帝欲親征樞密使與宰臣奏言京師者天下根本雖四方有變陛下宜居中以

制之但命將出征無煩躬御士伍帝曰紹榮討亂未有成功繼岌之軍尚留巴漢餘無可將者斷在自行樞密使李紹宏等奏曰陛下以謀臣猛將取天下今一州之亂而云無可將者何也總管李嗣源是陛下宗臣創業已來艱難百戰何城不下何賊不平威略之名振于夷夏以臣等籌之若委以專征鄴城之寇不足平也帝素寬大容納無疑于物自誅郭崇韜朱友謙之後闔宦伶官交相讒諂邦國大事皆聽其謀繇是漸多猜惑不欲大臣典兵旣聞奏議乃曰子侍嗣源侍衛卿當擇其次者又奏曰以臣等料之非嗣源不可河南尹張全義亦

奏云河朔多事久則患生宜令總管進兵如倚李紹榮輩未見其功帝乃命嗣源行營是日延州知州白彥琛奏緩銀兵士剽州城謀叛魏王繼岌傳送郭崇韜父子首函至闕下詔張全義收瘞之乙巳以右武衛上將軍李肅爲安邑解縣兩池榷鹽使以吏部尚書李琪爲國計使三月丁未朔李紹真奏收復邢州擒賊首趙太等二十一人徇于鄴都城下皆磔于軍門庚戌李紹真自邢州赴鄴都城下辛亥以威武軍節度副使福建管內都指揮使檢校太傅守江州刺史王延翰爲福建節度使依前檢校太傅王子李嗣源領軍至鄴都營于西南

隅甲寅進營于觀音門外下令諸軍詰曰攻城是夜城下軍亂迫嗣源爲帝遲明亂軍擁嗣源及霍彥威入于鄴城復爲皇甫暉趙進等所脅嗣源以詭詞得出夜分至魏縣時嗣源遙領鎮州詰曰議欲歸藩上章請罪安重誨以爲不可語在明宗紀中翼曰遂次于相州元行欽部下兵退保衛州以飛語上奏嗣源一日之中遣使上章申理者數四帝遣嗣源子從審與中使白從訓賁詔以諭嗣源行至衛州從審爲元行欽所械不得達是日西面行營副招討使任圜奏收復漢州擒逆賊康延孝丙辰荆南高季興上言請割峽內夔忠萬等三州却

歸當道依舊管係又請雲安監初將議伐蜀詔高季興令率本軍上峽自收元管屬郡軍未進夔忠萬三州已降季興數請之因賂劉皇后及宰臣樞密使內外叶附乃俞其請戊午詔河南府預借今年夏秋租稅時年饑民困百姓不勝其酷京畿之民多號泣于路議者以爲劉盆子復生矣庚申詔潞州節度使孔勅赴闕以右龍虎統軍安崇阮權知潞州是日忠武軍節度使齊王張全義薨壬戌宰臣豆盧革率百官上表以魏博軍變請出內府金帛優給將士不報時知星者上言客星犯天庫宜散府藏又云流星犯天梃主御前有急兵帝召宰

臣于便殿皇后出宮中妝奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者妝奩嬰孺而已可鬻之給軍革等惶恐而退癸亥以僞置昭武軍節度使林思謬爲閬州刺史是日出錢帛給賜諸軍兩樞密使及宋唐玉景進等各貢助軍錢幣是時軍士之家乏食婦女掇蔬于野及優給軍人皆負物而詬曰吾妻子已殍矣用此奚爲甲子元行欽自衛州率部下兵士歸帝幸耀店以勞之西川輦運金銀四十萬至關分給將士有差元行欽請車駕幸汴州帝將發京師遣中官向延嗣馳詔所在誅

蜀主王衍仍夷其族乙丑車駕發京師戊辰遣元行欽將騎軍沿河東向王申帝至滎澤以龍驤馬軍八百騎爲前軍遣姚彥溫董之彥溫行至中牟率所部奔于汴州時潘瓌守王村寨有積粟數萬亦奔汴州是時李嗣源已入于汴帝聞諸軍離散精神沮喪至萬勝鎮卽命旋師登路旁荒塚置酒視諸將流涕俄有野人進雉因問塚名對曰里人相傳爲愁臺帝彌不悅罷酒而去是夜次汜水初帝東出關從駕兵二萬五千及復至汜水已失萬餘騎乃畱秦州都指揮使張瑋以步騎二千守關帝過甕子谷道路險狹每遇衛士執兵仗者皆善言

撫之曰適報魏王繼岌又進納西川金銀五十萬到京當盡給爾等軍士對曰陛下賜與太晚人亦不感聖恩帝流涕而已又索袍帶賜從官內庫使張容哥對曰頒給已盡衛士叱容哥曰致吾君社稷不保是此闖豎抽刀逐之或救而獲免容哥謂同黨曰皇后惜物不散軍人歸罪于吾輩事若不測吾輩萬段願不見此禍因投河而死

隆平集內臣李承進逮事唐莊宗太祖嘗問莊宗時事對曰莊宗好畋獵每次近郊衛士必控馬首曰兒郎輩寒冷望陛下與救接莊宗隨所欲給之如此者非一晚年蕭牆之禍由賞賚無節威令不行也

太祖歎曰二十年來河戰爭不能以軍法約束此輩誠兒戲

甲戌次石橋帝置酒野次悲啼不樂謂元行欽等諸將曰鄴下亂離寇盜蜂起

總管迫于亂軍存亡未測今訛言紛擾朕實無聊卿等
事予已來富貴急難無不共之今茲危蹙賴爾籌謀而
竟默默無言坐觀成敗予在滎澤之日欲單騎渡河訪
求總管面爲方略招撫亂軍卿等各吐胃襟共陳利害
今日俾予至此卿等如何元行欽等百餘人垂泣而奏
曰臣本小人蒙陛下撫養位極將相危難之時不能立
功報主雖死無以塞責乞申後効以報國恩于是百餘
人皆援刀截髮置鬚于地以斷首自誓上下無不悲號
識者以爲不祥是日西京畱守張筠部署西征兵士到
京見于上東門外晡晚帝還宮初帝在汜水衛兵散走

京師恐駭不寧及帝至人情稍安乙亥百官進名起居
安義節度使孔勅奏點校兵士防城準詔運糧萬石進
發次時勅已殺監軍使據城詭奏也丙子樞密使李紹
宏與宰相豆盧革韋說會于中興殿之廊下商議軍機
因奏魏王西征兵士將至車駕且宜控汜水以俟魏王
從之午時帝出上東門親閱騎軍誠以詰旦東幸申時
還宮四月丁丑朔以永王存霸爲北都畱守申王存渥
爲河中節度使是日車駕將發京師從駕馬軍陳于寬
仁門外步兵陳于五鳳門外帝內殿食次從馬直指揮
使郭從謙自本營率所部抽戈露刃至興教門大呼與

黃甲兩軍引弓射與教門帝聞其變自宮中率諸王近衛禦之逐亂兵出門既而焚與教門緣城而入登宮牆

謹諫帝御親軍格鬪殺亂兵數百俄而帝為流矢所中

亭午崩于絳霄殿之廡下時年四十二琬琰集載宋實錄王全斌傳云

同光末蕭牆有變亂兵逼宮城近臣宿將皆釋甲潛遁

惟全斌與符彥卿等十數人居中拒戰莊宗中流矢扶掖歸絳霄殿全斌慟哭而去東都事略符彥卿傳云郭

從謙之亂莊宗左右皆引去惟彥卿力戰殺十餘人莊宗崩彥卿

慟哭而去是時帝之左右例皆奔散唯五坊人善友斂

廊下樂器簇于帝尸之上發火焚之及明宗入洛止得其

其燼骨而已天成元年七月丁卯有司上諡日光聖神閔孝皇帝廟號莊宗是月丙子葬于雍陵五代史補莊宗之嗣位也

志在渡河但恨河東地狹兵少思欲百練其眾以取必勝于天下乃下令曰凡出師騎軍不見賊不許騎馬或

步騎前後已定不得越軍分以避險惡其分路並進期會

有處不得違晷刻並在路敢言病者皆斬之故三軍懼法而戮力皆一以當百故朱梁舉天下而不能禦卒

為所滅良有以也初莊宗為公子時雅好音律又能自撰曲子詞其後凡用軍前後隊伍皆以所撰詞授之使

揭聲而唱謂之御製至于入陣不論勝負馬頭纔轉則眾歌齊作故凡所鬪戰人忘其死斯亦用軍之一奇也

莊宗好獵每出未有不蹂踐苗稼一旦至中牟圍合忽有縣令忘其姓名犯圍諫曰大凡有國家者當視民

如赤子性命所繫陛下以一時之娛恣其蹂踐使比屋囂然動溝壑之慮為民父母豈若是耶莊宗大怒以為

遭縣令所辱遂叱退將斬之伶官鏡新磨者知其不可乃與羣伶齊進挽住合伴為詬責曰汝為縣可以指麾

百姓為兒既天子好獵即合多留閑地安得縱百姓耕鋤皆徧妨天子鷹犬飛走耶而又不能自責更敢咄咄

吾知汝當死罪諸伶亦皆嘻笑繼和于是莊宗默然其怒少霽項之恕縣令罪五代史闕文莊宗嘗因博戲觀散子采有暗相輪者心悅之乃自置暗箭格凡博戲

並認采之在下者及同光末鄴都兵亂從謙以兵犯
興教門莊宗禦之中流矢而崩識者以爲暗箭之應
史臣曰莊宗以雄圖而起河汾以力戰而平汴洛家讐
旣雪國祚中興雖少康之嗣夏配天光武之膺圖受命
亦無以加也然得之孔勞失之何速豈不以驕于驟勝
逸于居安忘櫛沐之艱難徇色禽之荒樂外則伶人亂
政內則牝雞司晨斯愷貨財激六師之憤怨徵搜輿賦
竭萬姓之脂膏大臣無罪以獲誅衆口吞聲而避禍夫
有一于此未或不亡矧咸有之不亡何待靜而思之足
以爲萬世之炯戒也

舊五代史卷三十四

舊五代史卷三十四攷證

唐莊宗紀八令朱守殷以兵圍其第 案圍其第歐陽

史作圍其館胡三省云歐陽史蓋謂朱友謙無私第
在洛陽也據雲谷雜記唐末藩鎮入朝館舍皆稱邸
第似無庸更易其字通鑑仍從是書作第

三月丁未朔 丁未通鑑作丁巳

庚戌李紹真自邢州赴鄴都城下 案通鑑作庚申李
紹真引兵至鄴都營於城西北以太等徇于鄴城下
而殺之與是書異

甲寅進營于觀音門外下令諸軍詰旦攻城是夜城下

軍亂 案通鑑作壬戌李嗣源至鄴都甲子夜軍亂
攷異引莊宗實錄作壬戌至鄴都癸亥夜軍士張破
敗作亂與是書異日通鑑從是書

帝遣嗣源子從審 從審歐陽史及通鑑俱作從璟是
書本紀前後俱作從審未知何據

帝幸耀店以勞之 耀店通鑑作鷓店胡三省注云薛
史作耀店今仍其舊

甲戌次石橋 甲戌通鑑作甲申

四月丁丑朔 案歐陽史及通鑑五代春秋俱作四月
丁亥朔攷遼史天順元年卽同光四年亦作四月丁

亥朔是書莊宗紀作丁丑明宗紀作丁亥前後互異
攷是年正月戊午朔三月丁未朔則四月朔日當爲
丁丑

五坊人善友 案通鑑作鷹坊人善友胡三省注云鷹
坊唐時五坊之一也善姓也

安巴堅舊作阿保機今改 阿都欲舊作阿咄欲今改

舊五代史卷三十四攷證

舊五代史卷三十五

宋門下侍郎參知政事監修國史薛居正等撰

唐書第十一

明宗紀一

明宗聖德和武欽孝皇帝諱亶初名嗣源及卽位改今諱代北人也世事武皇及其錫姓也遂編于屬籍四代祖諱聿皇贈麟州刺史天成初追尊爲孝恭皇帝廟號惠祖陵曰遂陵高祖妣衛國夫人崔氏追諡爲孝恭昭皇后三代祖諱教皇贈朔州刺史追尊爲孝質皇帝廟號毅祖陵曰衍陵曾祖妣趙國夫人張氏追諡爲孝質

順皇后皇祖諱琰皇贈尉州刺史追尊為孝靖皇帝廟號烈祖陵曰奕陵皇祖妣秦國夫人何氏追諡為孝靖穆皇后皇考諱霓皇贈汾州刺史追尊為孝成皇帝廟號德祖陵曰慶陵皇妣宋國夫人劉氏追諡為孝成懿皇后帝即孝成之元子也以唐咸通丁亥歲九月九日懿皇后生帝于應州之金城縣初孝成事唐獻祖為愛將獻祖之失振武為吐渾所攻部下離散孝成獨奮忠義解蔚州之圍武皇之鎮鴈門也孝成厭代帝年甫十三善騎射獻祖見而撫之曰英氣如父可侍吾左右每從圍獵仰射飛鳥控弦必中尋隸武皇帳下武皇遇上

源之難將佐罹害甚眾帝時年十七翼武皇踰垣脫難于亂兵流矢之內獨無所傷武皇鎮河東以帝掌親騎時李存信為蕃漢大將每總兵征討師多不利武皇遂選帝副之所向克捷帝嘗宿于鴈門逆旅媼方娠不時具饌媼聞腹中兒語去大家至矣速宜進食媼異之遽起親奉庖爨甚恭帝詰之媼告其故北夢瑣言云帝以媼前倨後恭詰之曰公貴不可言也問其故異道娠子腹語事帝曰老媼遜言懼吾辱耳後果如其言帝既壯雄武獨斷謙和下士每有戰功未嘗自伐居常惟治兵仗持廉處靜晏如也武皇常試之召于泉府命恣其所取帝惟持束帛數緡而出凡所賜與分給部下嘗與諸將會

諸將矜衒武勇帝徐曰公輩以口擊賊吾以手擊賊衆
慙而止景福初黑山戍將王弁據振武叛帝率其屬攻
之擒弁以獻乾寧三年梁人急攻兗鄆帥朱瑄求救
于武皇武皇先遣騎將李承嗣史儼援之復遣李存信
將兵三萬屯于莘縣聞汴軍益盛攻兗甚急存信遣帝
率三百騎而往敗汴軍于任城遂解兗州之圍朱瑾見
帝執手涕謝其年魏帥羅宏信背盟襲破李存信于莘
縣帝奮命殿軍而還武皇嘉其功卽以所屬五百騎號
曰橫衝都侍于帳下故兩河間目帝爲李橫衝明年武
皇遣大將軍李嗣昭率師下馬嶺關將復邢洛梁將葛

從周以兵應援嗣昭兵敗退入青山口梁軍扼其路步
兵不戰自潰嗣昭不能制會帝本軍至謂嗣昭曰步兵
雖散若吾輩空迴大事去矣爲公試決一戰不捷而死
差勝被囚嗣昭曰吾爲卿副帝率其屬解鞍礪鏃憑高
列陣左右指畫梁人莫之測因呼曰吾王命我取葛司
徒他士可無併命卽徑犯其陣奪擊如神嗣昭繼進梁
軍卽時退去帝與嗣昭收兵入關帝四中流矢血流被
股武皇解衣授藥手賜卮酒拊其背曰吾兒神人也微
吾兒幾爲從周所笑自青山之戰名聞天下天復中梁
祖遣氏叔琮將兵五萬營于洞渦是時諸道之師畢萃

于太原郡縣多陷于梁晉陽城外營壘相望武皇登陴號令不遑飲食屬大雨彌旬城壘多壞武皇令帝與李嗣昭分兵四出突入諸營梁軍由是引退帝率偏師追襲復諸郡邑昭宗之幸鳳翔也梁祖率衆攻圍岐下武皇奉詔應援遣李嗣昭周德威出師晉絳營于蒲縣嗣昭等軍大爲梁將朱友寧氏叔琮所敗梁之追兵直抵晉陽營于晉祠日以步騎環城武皇登城督衆憂形于色攻城既急武皇與大將謀欲出奔雲中帝曰攻守之謀據城百倍但兒等在必能固守乃止居數日潰軍稍集率敢死之士日夜分出諸門掩襲梁軍擒其驍將游

崑崙等梁軍失勢乃燒營而退天祐五年五月莊宗親將兵以救潞州之圍帝時領突騎左右軍與周德威分爲二廣帝晨至夾城東北隅命斧其鹿角負芻填塹下馬乘城大譟時德威登西北隅亦譟以應之帝先入夾城大破梁軍是日解圍其功居最柏鄉之役兩軍旣成列莊宗以梁軍甚盛慮師入之怯欲激壯之手持白金巨鍾賜帝酒謂之曰卿見南軍白馬赤馬都否覩之令人膽破帝曰彼虛有其表耳翼日當歸吾廡中莊宗拊髀大笑曰卿已氣吞之矣帝引鍾盡醕卽屬鞭揮弭躍馬挺身與其部下百人直犯白馬都奮槌舞稍生挾二

騎校而迴飛矢麗帝甲如蝟毛焉由是三軍增氣自辰及未騎軍百戰帝往來衝擊執訊獲醜不可勝計是日梁軍大敗以功授代州刺史莊宗遣周德威伐幽州帝分兵略定山後八軍與劉守光愛將元行欽戰于廣邊軍凡八戰帝控弦發矢七中行欽酣戰不解矢亦中帝股拔矢復戰行欽窮蹙面縛乞降帝酌酒飲之拊其背曰吾子壯士也因厚遇之十三年二月莊宗與梁將劉鄩大戰于故元城北帝以三千騎環之鼓譟奮擊內外合勢鄩軍殆盡帝徇地磁洛四月相州張筠遁走乃以帝爲相州刺史九月滄州節度使戴思遠棄城歸汴小將毛璋據州納款莊宗命率兵慰撫旣入城以軍府又安報莊宗書吏誤云已至滄州禮上畢莊宗省狀怒曰嗣源反耶帝聞之懼歸罪于書吏斬之未幾承制授邢州節度使十四年四月契丹安巴堅率衆三十萬攻幽州周德威間使告急莊宗召諸將議進取之計諸將咸言敵勢不能持久野無所掠食盡自還然後踵而擊之可也帝奏曰德威盡忠于家國孤城被攻危亡在即不宜更待敵衰願假臣突騎五千爲前鋒以援之莊宗曰公言是也卽命帝與李存審閻寶率軍赴援帝爲前鋒會軍於易州帝謂諸將曰敵騎以馬上爲生不須營壘

況彼衆我寡所宜銜枚箝馬潛行溪澗襲其不備也八月師發上谷陰晦而雨帝仰天祈祝卽時晴霽師循大房嶺緣澗而進翼日敵騎大至每遇谷口敵騎扼其前帝與長子從珂奮命血戰敵卽解去我軍方得前進距幽州兩舍敵騎復當谷口而陣我軍失色帝曰爲將者受命忘家臨敵忘身以身殉國正在今日諸君觀吾父子與敵周旋因挺身入于敵陣以北語諭之曰爾輩非吾敵吾當與天皇較力耳舞榭奮擊萬衆披靡俄挾其隊帥而還我軍呼躍奮擊敵衆大敗勢如席卷委棄鎧仗羊馬殆不勝紀是日解圍大軍入幽州周德威迎帝執手歔歔九月班師于魏州莊宗親出郊勞進位檢校太保十八年十月從莊宗大破梁將戴思遠于戚城斬首二萬級莊宗以帝爲蕃漢副總管加同平章事二十年代李存審爲滄州節度使四月莊宗卽位于鄴宮帝進位檢校太傅兼侍中尋命帝率步騎五千襲鄆州下之授天平軍節度使五月梁人陷德勝南城圍楊劉以扼出師之路帝孤守汶陽四面拒寇久之莊宗方解楊劉之圍九月梁將王彥章以步騎萬人迫鄆州自中都渡汶帝遣長子從珂率騎逆戰于遞坊鎮獲梁將任劍等三百人彥章退保中都莊宗聞其捷自楊劉引軍至

鄆以帝爲前鋒大破梁軍于中都生擒王彥章等是日諸將稱賀莊宗以酒屬帝曰昨朕在朝城諸君多勸朕棄鄆州以河爲界賴副總管禦侮于前崇韜畫謀于內若信李紹宏輩大事已掃地矣莊宗與諸將議兵所向諸將多云青齊徐兗皆空城耳王師一臨不戰自下惟帝勸莊宗徑取汴州語在莊宗紀中莊宗嘉之帝卽時前進莊宗繼發中都十月己卯遲明帝先至汴州攻封邱門汴將王瓚開門迎降帝至建國門聞梁主已殂乃號令安撫迴軍于封禪寺辰時莊宗至帝迎謁路側莊宗大悅手引帝衣以首觸帝曰吾有天下由公之血戰

也當與公共之尋進位兼中書令二年正月契丹犯塞帝受命北征二月莊宗以郊天禮畢賜帝鐵券四月潞州小將楊立叛帝受詔討之五月擒楊立以獻六月進位太尉移鎮汴州代李存審爲蕃漢總管十二月契丹入寇三年正月帝領兵破契丹于涿州移授鎮州節度使先是帝領兵過鄴鄴庫素有御甲帝取五百聯以行是歲莊宗幸鄴知之怒甚無何帝奏請以長子從珂爲北京衙內都指揮使莊宗愈不悅曰軍政在吾安得爲子奏請吾之細鎧不奉詔旨強取其意何也令畱守張憲自往取之左右說諭乃止帝憂恐不自安上表申理

方解十二月帝朝于洛陽是時莊宗失政四方饑饉軍士匱乏有賣兒貼婦者道路怨咨帝在京師頗爲謠言所屬泊朱友謙郭崇韜無名被戮中外大臣皆懷憂懼諸軍馬步都虞候朱守殷奉密旨伺帝起居守殷陰謂帝曰德業震主者身危功蓋天下者不賞公可謂震主矣宜自圖之無與禍會帝曰吾心不負天地禍福之來吾無所避付之于天卿勿多談也四年二月六日趙在禮據魏州反莊宗遣元行欽將兵攻之行欽不利退保衛州初帝善遇樞密使李紹宏及帝在洛陽羣小多以飛語謗毀紹宏每爲庇護會行欽兵退河南尹張全義

密奏請委帝北伐紹宏贊成之遂遣帝將兵渡河三月六日帝至鄴都趙在禮等登城謝罪出牲餼以勞師帝亦慰納之營于鄴城之西南下令以九日攻城八日夜軍亂從馬直軍士有張破敗者號令諸軍各殺都將縱火焚營謹諫雷動至五鼓亂兵逼帝營親軍搏戰傷夷者殆半亂兵益盛帝叱之責其狂逆之狀亂兵對曰昨日州戍兵主上不垂厚宥又聞鄴城平定之後欲盡坑全軍某等初無叛志直畏死耳已共諸軍商量與城中合勢擊退諸道之師欲主上帝河南請令公帝河北帝泣而拒之亂兵呼曰令公欲何之不帝河北則爲他人

所有苟不見幾事當不測抽戈露刃環帝左右安重誨

霍彥威躡帝足請詭隨之因爲亂兵迫入鄴城懸橋已

發共扶帝越濠而入趙在禮等歡泣奉迎

通鑑亂兵擁
嗣源及李紹

真等入城城中不受外兵皇甫暉逆擊張破敗
斬之外兵皆潰趙在禮等率諸校迎拜嗣源

是日饗

將士于行宮在禮等不納外兵軍衆流散無所歸向帝

登南樓謂在禮曰欲建大計非兵不能集事吾自于城

外撫招諸軍帝乃得出夜至魏縣部下不滿百人時霍

彥威所將鎮州兵五千人獨不亂聞帝旣出相率歸帝

詰朝帝登城掩泣曰國家患難一至于此來日歸藩上

章徐圖再舉安重誨霍彥威等曰此言非便也國家付

以閩外之事不幸師徒逗撓爲賊驚奔元行欽狂妄小

人彼在城南未聞戰聲無故棄甲如朝天之日信其奏

陳何所不至若歸藩聽命便是強據要君正墮讒慝之

口也正當星行歸闕面叩玉階讜聞阻謀庶全功業無

便于此者也帝從之十一日發魏縣至相州獲官馬二

千匹始得成軍元行欽退保衛州果以飛語上奏帝上

章申理莊宗遣帝子從審及內官自從訓齋詔諭帝從

審至衛州爲行欽所械帝奏章亦不達帝乃趨白臯渡

駐軍于河上會山東上供綱載絹數船適至乃取以賞
軍軍士以之增氣及將濟以渡船甚少帝方憂之忽有

木棧數隻沿流而至卽用以濟師故無留滯焉二十六
日至汴州莊宗領兵至滎澤遣龍驤都校姚彥溫爲前
鋒是日彥溫率部下八百騎歸于帝具言主上爲行欽
所惑事勢已離難與共事帝曰卿自不忠言何悖也乃
奪其兵仍下令曰主上未諒吾心遂致軍情至此宜速
赴京師旣而房知溫杜晏球自北面相繼而至四月丁
亥朔至嬰子谷聞蕭牆釁作莊宗晏駕帝慟哭不自勝
詰旦朱守殷遣人馳報京城大亂燔剽不息請速至京
師已丑帝至洛陽止于舊宅分命諸將止其焚掠百官
弊衣旅見帝謝之斂衽泣涕時魏王繼岌征蜀未還帝

謂朱守殷曰公善巡撫以待魏王吾當奉大行梓宮山
陵禮畢卽歸藩矣是日羣臣諸將上牋勸進帝面諭止
之樞密使李紹宏張居翰宰相豆盧革韋說六軍馬步
都虞候朱守殷青州節度使符習徐州節度使霍彥威
宋州節度使杜晏球兗州節度使房知溫等頓首言曰
帝王應運蓋有天命三靈所屬當協冥符福之所鍾不
可以謙遜免道之已喪不可以智力求前代因敗爲功
殷憂啟聖少康重興于有夏平王再復于宗周其命維
新不失舊物今日廟社無依人神乏主天命所屬人何
能爭光武所謂使成帝再生無以讓天下願殿下俯徇

樂推時哉無失軍國大事望以教令施行帝優答不從
壬辰文武百寮三拜牋請行監國之儀以安宗社答旨
從之既而有司上監國儀注甲午幸太內興聖宮始受
百寮班見之儀所司議卽位儀注霍彥威孔循等言唐
之運歷已衰不如自創新號因請改國號不從土德帝
問藩邸侍臣左右奏曰先帝以錫姓宗屬爲唐雪寃以
繼唐祚今梁朝舊人不願殿下稱唐請更名號帝曰予
年十三事獻祖以予宗屬愛幸不異所生事武皇三十
年排難解紛櫛風沐雨冒刃血戰體無完膚何艱險之
不歷武皇功業卽予功業先帝天下卽予天下也兄亡

弟紹于義何嫌且同宗異號出何典禮歷之衰隆吾自
當之衆之莠言吾無取也時羣臣集議依違不定惟吏
部尚書李琪議曰殿下宗室勳賢立大功于三世一朝
雨泣赴難安定宗社撫事因心不失舊物若別新統制
則先朝便是路人熒熒梓宮何所歸往不惟殿下追感
舊君之義羣臣何安請以本朝言之則睿宗文宗武宗
皆以弟兄相繼卽位柩前如儲后之儀可也于是羣議
始定河中軍校王舜賢奏節度使李存霸以今日三日
出奔不知所在乙未敕曰寡人允副羣情方監國事外
安黎庶內睦宗親庶諧惇敘之規永保隆平之運昨京

都變起禍難薦臻至于戚屬之間不測驚奔之所慮因
 藏竄濫被傷夷言念于茲自然流涕宜令河南府及諸
 道應諸王眷屬等昨因驚擾出奔所至之處即時津送
 赴闕如不幸物故者量事收瘞以聞北夢瑣言莊宗諸弟存紀存確匿于
南山民家人有以報安重誨者重誨曰主上以下詔尋訪帝之仁德必不加害不如密令殺之果併命于民家
後明宗聞之切讓重誨傷惜久之以中門使安重誨為樞密使以鎮州

別駕張延朗為樞密副使以客將范延光為宣徽使進
 奏官馮贇為內客省使丙申下敕今年夏苗委人戶自
 供通頃畝五家為保本州具帳送省州縣不得差人檢
 括如人戶隱欺許人陳告其田倍徵已亥命石敬瑭權

知陝州兵馬留後皇子從珂權知河南府兵馬留後庚
 子淮南楊溥進新茶以權知汴州軍州事孔循為樞密
 副使以陳州刺史劉仲殷為鄧州留後以鄭州防禦使
 王思同為同州留後敕曰租庸使孔謙濫承委寄專掌
 重權侵剝萬端姦欺百變遂使生靈塗炭軍士飢寒成
 天下之瘡痍極人間之疲弊載詳衆狀側聽輿辭難私
 降黜之文合正誅夷之典宜削奪在身官爵按軍令處
 分雖犯衆怒特貸全家所有田宅並從籍沒是日謙伏
 誅敕停租庸名額依舊為鹽鐵戶部度支三司委宰臣
 豆盧革專判中書門下上言請停廢諸道鹽運使內勾

司租庸院大程官出放豬羊柴炭戶括田竿尺一依朱
梁制度仍委節度刺史通申三司不得差使量檢州使
公解錢物先被租庸院管繫今據卻還州府州府不得
科率百姓百姓合散蠶鹽每年祇二月內一度俵散依
夏稅限納錢夏秋苗稅子除元徵石斗及地頭錢餘外
不得紐配先遇赦所放逋稅租庸違制徵收並與除放
今欲曉告河南府及諸道準此施行從之是日宋州節
度使元行欽伏誅壬寅以樞密副使孔循爲樞密使

舊五代史卷三十五

舊五代史卷三十五攷證

唐明宗紀一三代祖諱教 教原本作敖今據五代會
要改正

皇考諱覓 歐陽史云父電未知孰是

襲破李存信於莘縣 莘縣原本作華縣今據新唐書
藩鎮傳改正

柏鄉之役 柏鄉原本訛松鄉今據通鑑改正

吾當與天皇較力耳 天皇原本作人皇攷遼史太祖
稱爲天皇讓宗追稱人皇莊宗初年侵幽州者乃太
祖非讓宗也今改正

十二月契丹入寇三年正月帝領兵破契丹于涿州

案歐陽史云冬契丹侵漁陽嗣源敗之于涿州入寇
破敵皆作冬間事蓋順文併敘之耳當以是書爲徵
實

請令公帝河北 河北原本作河中今據通鑑改正

獲官馬二千匹 案歐陽史作掠小坊馬三千匹

四月丁亥朔 案丁亥朔與莊宗紀異據莊宗紀三月
丁未朔則四月當作丁丑據此紀下文有己丑甲午
則當作丁亥前後參差未詳孰是

己丑 案通鑑作乙丑疑傳寫之訛歐陽史從是書作


己丑

以樞密副使孔循爲樞密使 案歐陽史作左驍衛大

將軍孔循爲樞密使吳縝纂誤云孔循傳作左衛大
將軍爲樞密使俱與是書異

安巴堅舊作阿保機今改

舊五代史卷三十五攷證



舊五代史卷三十六

宋門下侍郎參知政事監修國史薛居正等撰

唐書第十二

明宗紀二

天成元年夏四月丙午帝自興聖宮赴西宮文武百僚
縞素于位帝服斬衰親奉攢塗設奠哭盡哀乃于柩前
卽皇帝位百官易吉服班于位帝御衮冕受冊訖百僚
稱賀丁未羣官縞素赴西宮臨以樞密使安重誨爲檢
校司空守左領軍大將軍依前充樞密使宰臣豆盧革
等三上表請聽政從之遣使往諸道及淮南告哀辛亥

帝始聽政于中興殿壬子西南面副招討使工部尚書
任圜率步騎二萬六千人入見甲寅帝御文明殿受朝
制改同光四年爲天成元年大赦天下後宮內職量留
一百人內官三十人教坊一百人鷹坊二十人御廚五
十人其餘任從所適諸司使務有名無實者並停分遣
諸軍就食近畿以減饋送之勞秋夏稅子每斗先有省
耗一升今後祇納正數其省耗宜停天下節度防禦使
除正至端午降誕四節量事進奉達情而已自于州府
圓融不得科斂百姓其刺史雖遇四節不在貢奉諸州
雜稅宜定合稅物色名目不得邀難商旅租庸司先將

繫省錢物與人迴圖宜令盡底收納以塞倖門云乙卯
渤海國王大謹讓遣使朝貢是月北京副留守知留守
事張憲賜死以其失守故也五月丙辰朔帝不視朝臨
于西宮宰相豆盧革進位左僕射韋說進位門下侍郎
兼戶部尚書監修國史並依舊平章事兗州節度使檢
校太傅朱守殷加同平章事充河南尹判六軍諸衛事
滄州節度使檢校太傅安元信加同平章事移鎮徐州
邠州節度使檢校太保毛璋加同平章事以太子賓客
鄭珏爲中書侍郎兼刑部尚書同中書門下平章事以
工部尚書任圜爲中書侍郎兼工部尚書同中書門下

平章事判三司徐州節度使李紹真貝州刺史李紹英
齊州防禦使李紹虔河陽節度使李紹奇洛州刺史李
紹能等上言前朝寵賜姓名今乞還舊內李紹虔上言
臣本姓王後移杜氏蒙前朝賜今姓名乞復本姓詔並
可之李紹真復曰霍彥威李紹英復曰房知溫李紹虔
復曰王晏球李紹奇復曰夏魯奇李紹能復曰米君立
青州節度使檢校太傅同平章事符習加兼侍中徐州
節度使檢校太傅霍彥威加兼侍中移鎮鄆州丁巳初
詔文武百僚正衙常參外五日一度內殿起居五代會
要天成
元年五月三日敕今後宰臣文武百官除常朝外每五
日一度入內起居其中書非時有急切公事請開延英

不在麟州奏指揮使張延寵作亂焚剽市民已殺戮訖
此限

戊午河陽節度使夏魯奇加檢校太傅以貝州刺史房
知溫爲兗州節度使以齊州防禦使王晏球爲宋州節
度使以洛州刺史米君立爲邢州節度使己未賜文武
百官驢馬各一西都知府張籤進魏王繼岌打毬馬七
十二匹北京馬步都指揮使李從溫奏準詔誅宦官初
莊宗遇內難宦者數百人竄匿山谷落髮爲僧奔至太
原七十餘人至是盡誅于都亭驛辛酉詔華州放散西
川宮人各歸骨肉壬戌以前相州刺史北京左右廂都
指揮使安金全爲安北都護振武節度使同平章事甲

子前西都留守京兆尹張筠加檢校太傅充山南西道節度使以夔州節度使李紹文爲遂州節度使以前鄧州留後戴思遠爲洋州節度使丁卯以金吾將軍張實爲金州防禦使戊辰以金紫光祿大夫檢校司空趙在禮爲滑州節度使加檢校太保制下在禮以軍情不順爲辭不之任以許州留後陶玘爲鄧州留後以諸道馬步副都指揮使安審通爲齊州防禦使庚午以權知北京軍府事汾州刺史符彥超爲晉州留後以前陳州刺史劉仲殷爲陝州留後癸酉以前磁州刺史劉彥琮爲同州留後甲戌福州節度使檢校太傅王延翰加檢校

太尉同平章事乙亥翰林學士戶部侍郎知制誥馮道

翰林學士中書舍人趙鳳俱以本官充端明殿學士端

明之職自此始也

五代會要明宗初登位四方書奏多令樞密使安重誨讀之不曉文義于

是孔循獻議因唐室侍讀之號卽創端明學士之名命馮道等爲之丙子詔故西道行營

都招討制置等使守侍中監修國史兼樞密使郭崇韜

宜許歸葬其世業田宅並還與骨肉故萬州司戶朱友

謙可復護國軍節度使守太師兼尚書令河中尹西平

王所有田宅財產並還與骨肉丁丑西都衙內指揮使

張籤進納僞蜀主王衍犀玉帶各二條馬一百五十匹

初莊宗遣中官向延嗣就長安之殺王衍也旋屬蕭牆

之禍延嗣藏竄不知所之而行之資裝妓樂並爲錢所
有復懼事泄故聊有此獻戊寅以樞密使安重誨兼領
襄州節度使制下重誨之黨謂重誨曰襄州地控要津
不可乏帥無宜兼領重誨卽自陳退許之以左金吾大
將軍張遵誨爲西京副留守知留守事辛巳以衛尉卿
李懌爲中書舍人充翰林學士壬午以前蔚州刺史張
溫爲振武留後以左右廂突陣指揮使康義誠爲汾州
刺史以左右廂馬軍都指揮使索自通爲忻州刺史尚
父吳越國王錢鏐遣使進金器五百兩銀萬兩綾萬匹
謝恩賜玉冊金印初同光季年鏐上疏密求玉冊金印

郭崇韜進議以爲不可而樞密承旨段佶受重賂贊

成其事莊宗卽允其請至是故有貢謝甲申幽州節度
使檢校太保李紹斌加檢校太傅同平章事復姓名爲

趙德鈞乙酉詔百官朔望入閣賜廊下食自亂離以前

常參官每日朝退賜食于廊下謂之廊餐乾符之後百

司經費不足無每日之賜至是遇入閣卽賜之五代會

初卽位命百官五日一起居李琪以爲非故事請罷之

惟每月朔望日合入閣賜食至是宣旨朔望入閣外仍

五日一起居遂爲定式六月戊子前襄州節度使李紹珙起復依

前襄州節度使仍復本姓名曰劉訓以皇子河中留後
從珂爲河中節度使百僚表賀以翰林承旨兵部尚書

知制誥盧質爲檢校司空充同州節度使己丑以吏部尚書判太常卿事李琪爲御史大夫以禮部尚書崔協爲太常卿判吏部尚書銓事以御史中丞崔居儉爲兵部侍郎以太子賓客蕭頊爲禮部尚書中書奏請以九月九日皇帝降誕日爲應聖節休假三日從之故忠武軍節度使檢校太師兼尚書令齊王張全義贈太師以前尚書右丞崔沂爲尚書左丞丙申新州留後張承裕雲州留後高行珪並正授本軍節度使丁酉詔曰四夷來王歷代故事前後各因強弱撫制互有典儀大蕃須示于威容卽于正衙引對小蕃但推于恩澤仍于偏殿

撫懷憲府奏論禮院詳酌皆徵故實咸有明文正衙威容未可全廢內殿恩澤且可常行若遇大蕃入朝卽準舊儀于正殿排比鋪陳立仗百官排班于正門引入對見時百僚入閣班退後卻引對朝貢蕃客御史大夫李琪奏論之下禮部檢討而降是命焉戊戌樞密使安重誨加檢校太保行兵部尚書事如故以太子詹事劉岳爲兵部侍郎以太子右庶子王權爲戶部侍郎以太子左庶子任贊爲工部侍郎庚子荆南節度使檢校太師兼尚書令南平王高季興加守太尉兼尚書令澤潞節度使檢校太傅同平章事孔勅加兼侍中汴州屯駐控

鶴指揮使張諫等謀叛伏誅以樞密使孔循權知汴州
軍州事甲辰樞密使孔循加檢校太保守秘書監依前
充使己巳以秘書少監姚顛爲左散騎常侍以太子左
諭德陸崇爲右散騎常侍以兵部郎中蕭希甫爲左諫
議大夫前幽州節度判官呂夢奇爲右諫議大夫以鄴
都副畱守孫岳爲潁州團練使詔曰古者酌禮以制名
懼廢于物取其難犯而易避貴便于時况徵在二名抑
有前例以太宗文皇帝自登寶位不改舊稱時卽臣有
世南官有民部靡聞曲避止禁連呼朕猥以眇躬託于
人上止遵聖範非敢自尊應文書內所有二字但不連

稱不得迴避如是臣下之名不欲與君親同字者任自
改更丁未中書門下奏京城潛龍舊宅望以至德宮爲
名從之戊申夏州節度使開府儀同三司檢校太師兼
中書令朔方王李仁福加食邑一千戶以延州畱後高
允韜爲延州節度使以利州節度觀察畱後張敬詢爲
利州節度使劍南西川節度副大使知節度事孟知祥
加檢校太傅兼侍中劍南東川節度副大使知節度事
董璋加檢校太傅壬子鳳翔節度使檢校太尉兼中書
令李曦加檢校太師兼中書令汴州知州孔循奏召集
謀亂指揮使趙虔已下三千人並族誅訖甲寅以晉州

留後符彥超爲北京留守以鎮州副使王建立爲鎮州
留後以右龍武統軍安崇阮爲晉州留後荆南節度使
高季興上言夔忠萬三州舊是當道屬郡先被西川侵
據今乞卻割隸本管詔可之其夔州僞蜀先曾建節宜
依舊除刺史通鑑攷異引十國紀年荆南史天成元年
二月壬辰請忠夔萬州及雲安監隸本道
莊宗許之詔命未下莊宗遇弒六月壬辰王表求三州明宗許之秋七月乙卯朔以太
原舊宅爲積慶宮庚申契丹渤海國俱遣使朝貢甲子
詔割韓城邵陽兩縣屬同州誅滑州左右崇牙及長劍
等軍士數百人夷其族作亂故也其都校于可洪等相
次到關亦斬于都市丁卯以僞蜀守司空門下侍郎平

章事晉國公王諧爲檢校司空守陵州刺史以虢州刺
史石潭爲耀州團練使辛未詔諸道節度刺史文武將
吏舊進月旦起居表今後除節度留後團練防禦使惟
正至進賀表其四孟月並且止絕甲戌中書門下上言
宣旨令進納新授諸道判官州縣官官告敕牒祇應宣
賜準往例除將相外並不賜官告卽因梁氏起例凡宣
授官竝特恩賜臣等商量自兩使判官令錄在京除授
者卽于內殿謝恩便辭赴任不更進納官告判司主簿
不合更許朝對敕下後望準舊例處分從之乙亥莊宗
皇帝梓宮發引帝衰服臨送于樓前是日葬莊宗于雍

陵鎮州留後王建立奏涿州刺史劉殷肇不受代謀叛
昨發兵收掩擒劉殷肇及其黨一十三人見折足勘詰
已卯以比部郎中知制誥楊凝式爲給事中充史館修
撰判館事以僞蜀吏部尚書楊玠爲給事中充集賢殿
學士判院事升應州爲彰德軍節度仍以興唐軍爲襄
州隸彰德軍宰相豆盧革貶辰州刺史韋說貶澉州刺
史仍令所在馳驛發遣爲諫議大夫蕭希甫疏奏故也
制略曰革則縱田客以殺人說則侵鄰家而奪井選元
亨之上第改王參之本名或王掌三司委元隨之務局
或陶鎔百里愛長吏之桑田咸屈塞于平人互阿私于

愛子任官匪當黷貨無厭謀人之國若斯致主之方安
在旣迷理亂又昧卷舒而府司案牘爰來諫署奏章疊
至備彰醜迹深汙明庭是宜約以三章投之四裔其河
南府文案及蕭希甫論疏竝宜宣示百僚庚辰賜蕭希
甫衣段二十匹銀器五十兩賞疏革說之罪也宰相鄭
珏任圜再見安重誨救解革說請不復追行後命又三
上表救解俱留中不報辛巳以捧聖嚴衛左廂馬步軍
都指揮使李從璋領饒州刺史充大內皇城使中書門
下奏條制檢校官各納尚書省禮錢舊例太師大尉納
四十千後減落至二十千太傅太保元納三十千減至

十五千司徒司空元納二十千減至一十千僕射尚書
元納一十五千減至七千員外郎中元納一十千今納
三千四百者詔曰會府華資皇朝寵秩凡霑新命各納
禮錢爰自近年多隳舊制遂致紀綱之地遽成廢墜之
司况累條流就從減省方當提舉宜振規繩但緣其間
翊衛勳庸藩宣將佐自軍功而遷陟示恩澤以獎酬須
議從權不在其例其餘自不帶平章事節度使及防禦
團練刺史使府副使行軍已下三司職掌監務官州縣
官凡關此例竝可徵納其檢校官自員外郎至僕射祗
初轉一任納錢若不改呼不在徵納仍委尚書省部司

專切檢舉置歷逐月具數申中書門下癸未詔辰州刺
史豆盧革可責授費州司戶參軍澱州刺史韋說可責
授夷州司戶參軍皆員外置同正員仍令馳驛發遣甲
申又詔曰責授費州司戶參軍豆盧革夷州司戶參軍
韋說等自居台輔累換歲華負先皇倚注之恩失大國
燮調之理朕自登宸極常委鈞衡略無謙遜之辭但縱
貪饕之意除官受賂樹黨徇私每虧敬于朕前徒自尊
于人上道路之誼騰不已諫臣之條疏頗多罪狀顯彰
典刑斯舉合從極法以塞羣情尚緣臨御之初含宏是
務特軫墜泉之慮爰施解網之仁曲示優恩俯寬後命

革可陵州長流百姓說可合州長流百姓仍委逐處長
知所在同州長春宮判官朝請大夫檢校尚書禮部郎
中賜紫金魚袋盧昇將仕郎守尚書屯田員外郎崇
文館學士賜緋魚袋韋濤等各因權勢驟列班行無才
業以可稱竊寵榮而斯久比行貶謫以塞尤違朕以纂
襲之初含容是務父既寬于後命子宜示于特恩竝停
見任昇濤卽革說之子也

舊五代史卷三十六

舊五史卷三十六攷證

唐明宗紀二西都知府張籤

張籤原本作張鏐今據

通鑑改正

故萬州司戶朱友謙

萬州原本作萬州今據歐陽史

改正

樞密承旨段佗

段佗九國志作段懷攷歐陽史及通

鑑並作段佗今仍其舊

正衙威容

正衙原本訛王衛今據冊府元龜改正

是日葬莊宗于雍陵

雍陵原本作永陵攷徐無黨五

代史注莊宗陵名雍陵石晉時避諱稱伊陵原本永

書卷三十一
字誤今改正又莊宗葬日通鑑從哀冊文作丙子是
書從實錄作乙亥

改王參之本名 案王參疑有舛誤據冊府元龜引薛
史亦作王參今無可攷姑仍其舊

舊五代史卷三十六攷證

